

下冊

書

桐鄉

下冊

張千黑

詩二十首

沈逢源

詩四十六首

皇甫坤

詩十三首

皇甫坤

詩二十一首

陸以括

詩四十九首

陸憲曾

詩十三首

徐祖欣

詩三十三首

汪熙

詩三十首

李日燧

詩四十五首

桐鄉盧景昌小覺采訪

孔憲采  
張士彬

詩四十九首  
詩五首

盧之貴

詩十九首

男景昌恭錄

張元吉

詩四十九首

胡桐封

詩八首

胡汝金

詩十四首

胡書勳

詩十七首

陸秉樞

詩三十二首

嚴銓

詩十九首

周官勳

詩五十二首

葉奎保

詩十七首

陸鈞

詩二十二首

陸鉞

詩十二首

盧景昌

詩三十八首

男福基恭錄補入冊內

張千里

字子方號夢廬桐鄉廩貢生歷署餘杭縣紹興府學訓導  
有珠村草堂詩草閩游草

光緒桐鄉縣志公自幼聰穎讀書日十行下長而博學能  
文章家故貧以館為生同村眉壽堂沈氏南宋來以醫世  
其業名聞遐邇公與沈本至戚又館其家十年故於讀書  
之暇輒就講貫醫理若有夙悟中表沈嗣龍家貧子幼臨  
歿託孤於公公慨然允之棄館行醫居眉壽堂十四年醫  
名大振就診者日百數十人並教其二子仍承世業而公  
之志願不樂此築珠村草堂聚書數萬卷講求詩古文詞  
與吳越間諸名士相倡和年五十六卒於家陸定圃冷  
廬雜識同邑張夢廬學博醫名隆赫道光間應閩浙總督

無錫孫文靖公之聘至閩時公患水脹已劇猶篤信草澤  
醫服攻水之藥自謂可痊張乃詳論病情反覆數千言勸  
其止藥私謂其僚屬曰元氣已竭難延至旬日矣越七日  
果卒張有謁孫宮保曰云身思報國仔肩重病為憂民  
措手難見所刊閩草游中

宿錢塘江寄別湯雨生副戎貽汾

將軍好武兼好文燕寢畫戟芸香薰將軍愛山兼愛客留客看山  
日岸幘有時吟遍六橋春寶馬細踏春山塵歸來畫山山欲活飛  
騎召客為題跋芒鞋走謁逢人日官閣梅花香滿室花前命酌春  
城晚匆匆送客閩山遠樟亭打鼓征帆促酒客夢吞江水綠他時

一卷閩游草醉飲高齋剪官燭

大雪渡仙霞嶺

山靈作意迎詩客十萬瓊瑤擲不惜裝點名山入畫圖粉本不許  
炫金碧我從浙西來萬山迭迎送此山獨矜異玉戲出奇弄玉龍  
銜銜導我道前珠機幾兩手揮雲煙萬峯凍立喋無語看我去謁仙  
霞仙仙霞高高不可及極直上要與青天逼瓊樓玉宇不勝寒詫  
極奇觀歸未得雪深路滑行蹤絕石稜刺足踵流血前頭失足後  
頭歎一落千丈誰能完橫空盤硬出奇句痛哭還笑華山韓一步  
一回首白雲橫塞龍溪口溪迴路轉忽崩豁玉山朗朗排左右中

間風作胡魔旋百道亂捲珠簾泉孤雲倒來雪噴湧一氣粉碎虛  
空懸長松岫強蒼髯怒瘦竹嫵娜纖腰偏楓嶺梨嶺杳莫數但見  
千樹萬樹都作梅花妍梅花開踏雪來梅花飛策蹇歸此遊生平  
最奇絕不必更慕峨嵋雪青霞八洞題詩去爛柯山畔留鴻跡

水口驛食雪花魚

桃花水漲雪花飛此景南天畫亦稀  
雪花魚

題朱海谷觀察 拒海上受降圖

陣雲西頽海濤立釜底百萬游魂泣一片降帆日邊出虬髯太守

能殺賊殺之又不忍撫之又巨測帳下橫刀千健兒各各顧視翻  
動色我我巨觴紅旗開海門鼓吹太守來爾賊我賊賊賊厥魁爾  
民我民不爾猜死生呼吸真可哀若崩厥角聲如雷爾有妻與孥  
何不安室廬城中有屋千萬區飲汲寢處惟所需爾有劍與戟何  
不為犁鋤山中有田皆膏腴爾耕爾食寬厥租飯香酒熟牛羊麩  
花帶蠻奴脫甲趨前者跳躍後歌呼一一羣向府中居青天白日  
生歡娛萬目睽睽看太守太守曰降我則受掀髯大笑指其口海  
水一杯今在手有如不信飲此水酒虎豹雖猛去其爪牙豺狼雖  
毒惡其室家南人不復反去堅攻其瑕太守能殺賊思威信有先

聲如加太守能降賊措置却無纖毫差至今海上息鯨鯢春波浩  
蕩天無涯殺賊則易降賊難形圖麟閣安足誇圖中之人今老矣  
詩成却顧興長嗟時清袖手了無事為我健筆驅龍蛇

古意一首贈李三復來

沉沉海天夜山色含餘輝物象渺終始我遇良亦微中情渺難伸  
託意在琴徽豈惜再三彈知音聽我稀坐久不知寒流月光在衣  
感嘆未終夕庭露皓已晞美人期不來朱絃為誰揮

山居

松風吹散帙蘿月照彈琴偶與古人對時聞谷鳥鳴空山無客到

永日坐花陰不覺爐香冷悠然見道心

逸林上人達德吳香圃茂才全昌過舍話雨竟夕

故人如好雨乘時一傾倒清風與之俱排闥塵埃掃安床避屋漏  
几席無乾燥吾儕本脫畧何暇慚隘秋舍南倚老槐上有藤花繞  
着雨愈爛熳軒陰綠楹綠陰悄於焉命觴酌杯盤具草草知我山  
廚荒携榼出鮮菹翻因客所貽餘味沾童媪粗糲腐儒餐客亦勉  
為飽人生既貧賤坐對妻孥老庶幾朋友來相與滌恚惱  
問藥日中集居然成一閑宵征無遠近擁得楫不得夢操術媿已  
疏形神徒倥偬惟此區區誠庶或與公共逸公支遁流神駿軼凡

眾靈蘭入室探腑肺隔垣洞我佛大慈悲要解眾疾痛南陽概不  
作古籍塵封棟斯道有淵源流一心與貫綜羣奸慧境燭妙偈拈  
花誦情勢每講張要在機宜中與人家國謀神明同妙用如何小  
道嗤兵借潢池弄水火刑荒外此節千秋慟所以范文正良醫託  
悲諷吳君苟有志他山藉磨礪醫人與醫國畸輕復畸重

昔我訪凌叟南濱入門雨一尺滿屋滔滔流耐此秋水白揖我坐  
麻床上主人雙脚赤高歌破屋詩邀我畫題壁今宵聽雨情感舊  
思曩昔伊人邈千載此事十年隔凌叟我熱友哀病江河客贈我  
書一篋叢殘少完籍自云物雖微留以慰思憶入夜發光怪熒熒

古血碧中有先賢書一一經邦畫忠介丁未造大節炳史冊惜哉  
有用人未得救飢渴溺世無蘇公長公遺疏復誰惜燈下共披吟  
簷溜淋浪滴願言素心人永此風雨夕

秀水王秋海秀才寄示冰雪寒林詞索題抱膝長吟圖

王郎不以圖索詩但寄一卷冰雪詞意中之人畫中面要我一一  
想見之嗚呼士不能耕例謀食飢驅道路少顏色有廬容膝即可  
安有詩欲吟耶可得想君儀觀何雍容諸葛君乃人中龍掉頭不  
揜泥塗脚空山嘯詠無春冬輪困鬱勃詩萬首藹若雲氣蟠心胸  
冰雪寒林人不到到者惟有漁樵蹤安得與君謀促膝論詩須問



杜陵律我詩如面吁可憎他日相逢應相識

湖上飲酒歌贈章二熊光

索書盈篋未識面思君慕君今始見君書瘦硬不諧俗早知風骨  
癯如鶴西湖六月荷花開好風吹我酒船來人生快意能幾日馳  
驅束縛良可哀君焚筆硯慎勿遲我提藥囊將破之學書費小醫  
費大同為人役形神疲青山知我今日閒凌波窈窕迎煙鬟况有  
巖壑任雲卧仙局不閉容躋攀如何混迹在塵市清泉可鑑真厚  
顏有酒痛飲莫辭醉花間月上何須還

題王休背坐頭陀象

面交毋乃多皮相安可得掉頭不肯顧旁觀皆動色附君之背君  
莫哀王郎王郎我識爾能識爾抑塞磊落之奇才傳神自具僧繇  
筆描頭畫角何為哉長松擎雪雲雲倒水羣山莽莽刺天起懸崖  
危坐尺有咫蛟龍伺人魑魅喜慎勿濯足寒潭裏男兒既不能圖  
形麒麟閣直豎錢眷老岩壑堂堂歲月付蒲團我行我法良不惡  
安能俯仰復隨人妍媸更受閒譏謔

題張孝善讀書秋樹根圖

男兒讀書無飽飯生歎田廬日荒蔓吾宗黃門老子孫壯歲飢飯  
驅抱破硯前年賃廡依舅氏去年賣字留江南歲暮冰霜阻歸楫

倚廬老母何能堪江南梅花香雪肥游子看花淚滿衣欲折一枝  
枝寄老母可惜梅花難療飢客游雖云樂不如繞膝長相依客囊  
雖羞澁不如徒手早歸來兒幼讀書母饑亦樂兒大好游母飽亦  
哭君家涉園有老屋屋後滿山多古木落葉滿薪煮藿粥母肯食  
貧兒苦讀

湖上遇徐二刺史保字歸自甘肅喜贈

得見西湖更見君湖樓秋色喜平分共憐蹤跡渾無着坐對青山  
看白雲

萬里歸來鬢有霜祇聞書卷滿奚囊把盃醉聽鏡歌曲重話伊涼

百戰場

菱塘櫂歌

村北村南盡水鄉西塘過去又東塘扁舟到處皆秋色十里菱花  
冷夕陽

漁燈三兩照漁磯網得魚蝦夜未歸柔櫓咿啞何處去過橋驚起

鷺鷥飛

英雄千古總荒萊煙樹空濛杜宇哀一片桃花紅雨裏踏青人上  
將墩來

絳春橋畔是儂家綠樹深深酒旆斜一徑牆陰人迹斷南風開編

紫藤花

小姑一語誤鴛鴦  
指點孤墳怨恨長  
日暮尋芳人影散  
梨花冷落野廬傍

沈蓬源

字學周號芝巖桐鄉諸生有芝巖詩草  
孔憲采雙溪詩匯云君少岐嶷兩月炯炯有光弱冠擅文  
名學使汪文端公廷珍拔冠一軍餽於庠名大噪善飲工  
詩屢試不售益縱酒致疾卒年僅三十有六

促促詞

促促復促促絮絮午時炊  
刺刺來朝粥男兒不合嗟  
仰屋拔劍出門刺九滿腹  
驅車上山車抽折軸石火  
路滑傷我犢風雪漫漫泥  
沒足猩猩吊影狐狸哭欲  
前又何在欲却無止宿促  
促復促促

答客問

紛紛干戈塞滿天海中竟有三神山我於此時願作仙叢叢朽骨  
化異物西方尚有天竺國我於此時願作佛煌煌斗握樞衆星燦  
天衢九重日下求賢詔風琴雅管揚八區仙佛兩不願願作明堂  
儒

贈沈可石

大化運若馳氣為之宣蓄世態亦萬更情為其輪轂我少負痴情  
論交以此卜情有不可禁推心置其腹喜或雜以怒歌竟繼以哭  
以我中所安期彼身之淑一二知己流藹藹相悅服張目又遇君  
此舌不能縮

雜詠

鏡無蒙塵明魚須活水養人心方寸餘內澄則外朗好議道愈離  
呈才情更蕩偏執以求勝綿力拘象項立異以求通隔靴爬足痒  
今人未稱快古人已受枉盡於氣憤時一作平心想

古詩三百篇立意皆有託鄭淫淫以聲朱註失穿鑿降至漢魏間  
詭才競浮薄一賦陽臺雲再賦神女洛遂開温李先體制日趨弱  
始惟文字乖終至人品惡窈窕豈不懷比中多失脚不見周文王  
關雎非自作

大道絕孔孟異端起莊列始成一家言禍至末流烈泥犁及輪迴

更勞廣長舌原彼西方心以為愚夫設人心日趨險異報所不惜  
恃此警頑聳或有小補益奈何高明者往往履履輒試問化城人  
果誰探閱老去僅留牙死來惟刺骨彼佛既已然真身焉可謁  
周家選舉廢士乃尚游說漢朝徵辟衰人亦鮮氣節咄嗟干時  
文逾趨竟逾拙昌黎下筆慚杜默眼中血一片敲門磚幾時繞指  
鐵決棄固難言專攻又不屑茫茫人海中感此一嗚咽

過爛溪遇大風雪

遙天亂碾瓊瑤屑橫看豎看一片白顛風乃與客爭程怒挾冰稜  
射人額我初瑟縮船中藏波聲四面如沸湯耳左右聽心胆惑有

如閨女防強梁淺灘前來風忽逼善然船背聲如割欲動不動低  
復昂篙師手向空中奪三人捉纜一髮牽雪花撲面飛如煙溪橋  
咫尺不得渡九步後却一步前我生本未涉險阻茲行毋乃太剛  
鹵占辰不閱協紀書風姨雪姊交相苦我聞王陽孝子王尊忠回  
馭策馭將毋同如我此行豈難緩乃以性命驕天公轉蓬入港波  
清淺紅墩隱躍遙能辨直到停舟泊岸時雙眉才向旁人展登堂  
展卷笑欲嗟此非陽春白雪歌從來名士原難做險被人稱曳落  
河

雨窗雜詩

層樓閉積雨濕氣入几硯  
寒簾騁遐矚草樹壓成片  
冷風吹雲來似霧撲人面  
沙嘴蝕舊痕田衣界密線  
煙濃遠村沒疏林近塔現  
一氣磅礴間寒聲互噴戰  
此景記依稀海嶽圖中見

寂坐既寡營幽懷乃親古  
插架縹函香發帙天葩吐  
求解厭紛揉博觀倦覩縷  
所精攬大畧抱膝意良苦  
經學猶堂奧史學猶門戶  
漢儒及宋人衛道猶環堵  
構此一大厦萬年絕規撫  
寄語素心人加餐力宜努  
舊雨杳不來今雨應期至  
密酒當窗絲相思織成字  
迢迢雙鯉魚臨風溯遐思  
淒風生暝愁寒松淡幽翠  
緬懷觴詠歡斜陽藹秋樹

西白

薄靄飛遙空暝色在江樹  
羣動一以息景物洽幽趣  
鴉歸衝夕煙蓬落聚漁渡  
憑欄引深酌心事醉鄉赴  
微風吹梧桐雨點涼於露  
安得掃頑雲酒面招寒兔

曉寒逗晴意步屨場圃閒  
雞鳴出籬落近水柴扉關  
膝漸度遠響澆澆隨溪灣  
寒花引疏蔓淡冶靡秋顏  
遙憶故園菊頗思命駕還  
奈此塵鞅絆非獨輪蹄艱  
矯首睇河側雙鷺相與閒

旅夜對月

秋色不可掩月明似水浮  
蒼蒼荻花外照見漁人舟  
松影淡欹石星芒低入樓  
今宵枕邊蝶定夢大刀頭

與可石論史自秦漢至梁陳得長短句二十首

三神山

三神山上有不死之藥可以駐童顏不信得位易得壽難蓬萊飄渺天風寒轉身大呼童男女大船峩峩求藥去求藥去藥何處咸陽宮中年復年海中徐市真成仙

坑諸生

戊子下詔焚六經己丑下令坑諸生諸生讀書無遠慮六經既焚便當去當時諫者子扶蘇扶蘇賢於諸大夫扶蘇既賢自應死不死誰立亡秦胡

易水歌

為天下殺秦皇帝秦皇帝死豈無繼一片白衣冠送君入死地咄哉無情鐵不及藥囊利反地欲為諸王謀地圖先為秦人收滅亡自取何足惜可惜夫人匕首將軍頭

一杯羹

峩峩高俎軍門列束縛老翁如縛鼈人羸未兆人犧供此何人哉漢太公太公漢王父忍云卽而翁而翁彼尚未忍烹王何為者思分羹他年有詔下朝堂特筆大書太上皇太上皇幸脫兒口正須却行奉竹帚

垓下歌

忽然楚歌四面起中宵拔劍劍色死美人帳下怨別離末路英雄亦兒女有酒不能乾有淚不能已大王能歌妾能和九原相從亦足矣君不見漢家雉

淮陰侯

楚漢分兵逐秦鹿成敗各以齊王卜齊王王齊由沛公沛公不負負蒯通吁嗟乎丈夫當為真王耳王不解此禍機始當年國士號無雙生之殺之兩女子

白頭翁

海上神仙無宮中巫蠱有一摘黃臺瓜再殺堯門母嗟嗞咄咄白頭翁淒淒切切來夢中木人地下紛相吊白日西傾忽返照君不見思子宮輪臺詔

漸臺誅

皇帝朝端假銅匱廟中拜俄而學古人分封畫經界軒轅重華周文公個個胡盧依樣畫君不見火光夜徹漸臺中天生之德遭天窮一部周官讀未熟後代更有王荆公

禪梁陰

赤伏符邀帝眷會昌符議封禪秘文玉簡誰所儲謬妄母乃同天



書桓譚流血鄭興喪魄祥瑞可不言圖讖不可易三十六事燦如  
日醴泉甘露戒勿筆

客星犯

古今奇事不數數帝腹乃加故人足一宵未必竟鼾眠定有嘉謀  
咨啓沃客星煌煌帝座旁干卿何事紛個張明朝撒手辭雙闕一  
領羊裘一灘月

捕黨人

詔版一出尚書省大將軍權如畫餅拔劍匆匆計更疏狐假虎威  
從茲逞明年下詔捕黨人黨人既去來黃巾黃巾來黨錮息黨之

恩人漢之賊

大小喬

選婿不必定坦腹國色能消國士腹有此兩人大足歡兵書得共  
郎君讀不見三分霸業開江東一時好色都英雄分香賜履嗟曹  
公

大討曹

大討曹大討曹此是國家之符瑞布諸中外慶所遭果是當車只  
一戰殺后稱尊畧如昔天道視人謀一仇復一仇討曹者為馬繼  
馬者乃牛

甯馨兒

甯馨兒乃狡兔三窟成藏身固羯奴來一網捕少無仕宦情長偏  
總國務國務豈所知三窟不可誤須曳倒牆窟亦亡一代風流此  
狡兔

王與馬

共天下者王與馬司徒一詔誰所寫待罪真稱病假全家既賴周  
伯仁殺賊又須溫太真致寇由國舅養賊又何人兩家之失殆等  
倫蘇武節元規塵

履齒折

入門履齒折兒輩已破敵試問建康奔孰與淝水克王謝當年門  
第同功名豈必由心術君不見司徒好清談太傅好聲色

立道場

漢明帝佞佛佛不保魏真君事仙仙安在孔子一死萬事乖奇奇  
怪怪塞四海仙佛二者豈盡誣其事或有理則無立道場造浮屠  
真仙真佛何有乎家亡國破不見仙佛扶

蕭老公

蕭老公心腸薄身將舍佛又可贖贖時須得億萬錢以錢奉佛佛  
曰諾無遮會涅般經皇帝講大眾聽短脚來困臺城臺城隔西天

不知幾萬程可惜西天佛不聞荷荷或是喚佛聲

烏幔囚

同泰寺中佛纔死龍光殿上又老子錚錚鐵騎擁入宮武緯文經  
盡如此脫去素衣裳置君烏幔裏十四萬卷誦讀多可惜不從大  
學起四百卷書著作多可惜不從天子始

後庭花

後庭花發臨春閣膝上美人參鳳諾王氣在東南皂莢乃大錯瓊  
枝璧月夜正長黃塵不見馬上郎三十六封堆御床百首新詩唱  
帝鄉沿江木姊忽已到帝兮帝兮井底藏青衣幸免當筵辱心肝

全無有酒腸

百鑑齋主人詠雪用東坡火义韻一時和者甚夥二酉兄馳  
書索和成二律報之

長空飛墮玉纖纖寒入江村暮更嚴散便成花真佛國飄來着樹  
卽天鹽光含窗影欺瑤席勢借狂風入畫檐擬遣冷筇扶我去漫  
山踏破鐵鞋尖

一度寒色凍啼鴉苦憶東南載酒車影舞碧空遙織素毫揮銀管  
對生花紅塵隔斷真千里白屋參差有幾家但覺光明欺倦眼開  
門難辨路三义

癸酉秋山左滑縣教匪竊發唐稼農姊文以照磨從那將軍

彥成討賊羽檄倥偬死於軍事家無遺貲遺孤未就傳也

淑園姊作七歌見示悲楚之音血淚俱迸因呈二律慰之  
欲試胸中有萬兵天涯孤館赴從征救貧難遣公無渡為國空憐  
死有名宦海路偏逢浪左書生命擬向天爭傷心織到璇璣字蘇  
蕙猶然是及生

一曲離鸞淚暗傾七歌吟出斷腸聲文章死後憑君護家計拋來  
祇獨撐未免伯龍招鬼笑自然桓邑有人旌熊丸留得先媛樣仁  
聽他年小鳳鳴

酬酬可石見贈之作

蕭然書劍走風塵落拓江村寄此生海內論文誰范式樽前知己  
有陳遵文章敢作千秋想心跡難逃一字真顛倒古今愁萬斛雙  
眉原不盼旁人

一溪雙峙隱侯樓巾月中間幾倡醅性直獨存真氣骨情深不作  
假風流華山有淚同韓愈酒市無人識馬周安得擁書三萬卷與  
君盟到水中鷗

縹雲石歌為馬容海賦

我聞三山海上浮洪濛靈根却孕圓嶠東天孫下織七襄錦拋梭

撒地光玲瓏蜿蜒直亘五百里春雲一擊飛天風又聞不周山崩  
地維缺長虹影裂共工血媧皇鍊石不如意紛紛餘塊互凹凸長  
空一擲帶浮雲萬古精靈常蘊結海昌舊有顧氏園仇池一文蟠  
蛟龜邇來不遣園丁掃風雨猶聞護曲田軒馬君好奇能脫俗春  
風遍踏陽城足偶然一見如故人採珍快比崑山玉主賓贈答何  
殷勤一舟浮碧攢苔紋草萊重闢廬山面遇合居然同拔薦栽花  
種竹費經營位置妥貼無敬傾題詩一冊索人和依稀說法來三  
生煩君洗石無纖芥好從石畔同長話君不見齊安供石東坡雅  
我效無為見石南宮拜

贈趙月香

池中有鴛鴦出處同飛翔庭中有蘭蕙彼此同清香臭味各有合  
情緣何可忘人生薄古誼反覆悲蒼黃寒冰不入炭世道炎與涼  
以膠投漆中但願君意長

雕鵬搏天雲燕雀睨堂室資秉判高下寸心知得失所期風雨中  
閉戶制暇逸囊螢有古人取鑒讀書術  
瞻彼南山麓脩竹方森森歲寒那可禦所得因虛心會晤不在遠  
牧豎抒清吟取益不在多八桂自成林  
于將莫屢擊積久鋒俱傷連城莫眩人有客伺其旁世故豈不險

禍福靡所常成蹊有桃李無言乃自芳  
藏薰不並猶采玉不登石貴賤各異途託交慎所擇素絲兩可污  
近墨不復赤尋常笑語中返躬自珍惜  
好花看及春美女看及少容華一不時詎免旁人誚楚楚鶴立姿  
君年正英妙扶桑日乍中四野歸明照努力登前程無為鸞鳩笑

皇甫坤

字楚琴號韻亭桐鄉諸生  
陸定圃冷廬雜識同里韻亭茂才情懷倜儻豪於酒詩筆  
亦俊所作隨手散棄偶檢篋中得其遺稿三首急錄之詠  
菊云幾番疏雨潤老圃菊初黃月色一籬淡露華三徑涼  
秋深人比瘦庭靜影俱香誰送白衣酒花前暢引觴題沈  
鏡湖垂釣圖云江北江南汗漫游歸來逸興寄扁舟白蘋  
風急秋將晚一尺鱸魚欲上鉤得魚換酒且高歌鷺友鷗  
賓日日過愛向水雲深處泊滿船明月卧煙蓑

題秋江釣月圖

滿湖秋月明涼風澹遠夕幽人發清興臨流詎皓魄玉宇淨無塵

銀蟾如可拾，艤舟蘆葦灘。綠煙波白羨，君高曠懷雅。異釣鼇客  
我欲從君游，鷗鄉分半席。

過鮑聽香脩竹幽居

先生何為不種蘭，風枝露葉秀可餐。先生何為不種菊，老圃寒香  
伴幽。獨庭前種得青琅玕，一叢翠色生晝寒。晴窗兀坐閒點筆，碧  
雲冉冉飛毫端。吾聞此君可醫俗，秋雨蕭瑟受寒玉。密篠風梳个  
个青，新篁煙鎖層層綠。想君坐對千筇管，詩情畫意情何長。斜陽  
半漏疏雨歇，清陰一片如瀟湘。

南湖村居

栽桑還種竹，茅舍近南湖。破屋牽蘿補，頽垣仗樹扶。蘆新添雁稅  
水淺減魚租。雙鬢星星老，今吾即故吾。

秋夜

急雨驅殘暑，新涼一夕生。碧梧添靜致，疏竹弄秋聲。倚枕聽蛩語  
推窗看月明。女牛今夜渡，銀漢一條橫。

偶成

綠陰如握小窗虛，靜坐應教俗慮除。話舊細斟文字酒，談奇勝讀  
快心書。一簾疎雨春光晚，半榻晴煙午夢餘。惆悵維摩偏善病，藥  
爐茗碗伴幽居。

題張春水長林石徑圖

芙蓉舊圃接漁磯古寺荒涼淡夕暉一徑白雲留客住滿林黃葉  
看僧歸鐘聲隔院晚來急晴翠漫空涼撲衣繪入輞川圖裏畫六  
朝遺蹟認依稀

秋日遣興

偶借微醺遣睡魔手栽盆樹幾摩挲曉窗試筆新詩少秋夜懷人  
遠夢多愁裏襟懷增感慨老來意氣半消磨蕭齋兀坐珠岑寂時  
有良朋感酒過

秋日晚步石林石徑

一溪秋水漸平隄疎柳參參影不齊葉葉滿灘風滿樹尋詩人在  
板橋西  
石徑紆迴引步長偶攜藜杖到禪房老僧晚飯閒無事獨倚小門  
看夕陽

春晚即事

草已成陰柳未棉江南三月豔陽天桃花放後春將晚白羽一雙  
相對眼

芙蓉浦晚歸

涼颼吹老白蘋洲溪粉輕紅別樣秋一種丰姿誰得似謝家詩家筆



最風流

十里波野唐爽氣收愛涼人倚水邊樓  
夢花漸老菱花白畫出江村  
一片秋

秋夜偶作

流螢惺惺弄微光星斗參橫夜漏長  
露氣漸濃花影淡碧梧庭院  
十分涼

皇甫璩

字珠庭桐鄉諸生有修竹廬詩稿  
陸定圃冷廬雜識吾邑珠庭茂才持躬端謹鄉里無間言  
工作試帖詩賦春隨人意生詩云江花三月暮謝草半池  
春見賞於學使者入泮所作試帖詩甚多惜身後散失殆  
盡

秋夜聞蛩

竟夜續殘更寒蟲唧唧鳴簾前風露冷向我報分明  
寒聲動四壁徹夜轉吟劇愧殺讀書人一燈孤影碧

村居

門閒無剝啄靜悄半弓苔老屋憑茅縛紙牆逐水回  
雞鳴知日午

犬吠識人來細雨霏荒徑將花任意栽

舟行

一棹扁舟去西風上野塘橋低垂柳卧岸近落花香宿鳥投林急  
歸人喚渡忙斜陽臨遠浦趁早到山莊

訪友

渡口煙凝野色昏人家小聚自成村幾重樹影深藏屋一路書聲  
尋到門湍地落花飛石徑隔鄰新竹透芳園我來却喜塵緣絕語  
罷無言鳥自喧

送春

詩筒酒榼早安排錢此春光信感懷門巷綠陰三月暮落花飛絮  
徧天涯

歸燕

一番秋信旅魂驚迢遞關山又欲行惆悵空梁餘故壘往來深巷  
記前盟杏花微雨江南路黃葉西風塞北情每到檐前如別我水  
晶簾外話分明

蟹簾

密插菱竿兩岸釘疎簾排處接寒汀一痕界破江心月半幅分開  
水面萍葭影低函晨露白浪花斜捲夜燈青幾回放棹秋波裏客

子舟歸攬夢醒

漁燈

一聲欸乃暮雲平  
幾點燈光水面生  
翠岸花疎看隱約  
楓橋月落認分明  
光浮隔浦潮初上  
影亂斜風鷺欲驚  
愧我江湖空有夢  
雪窗猶伴讀書聲

菊影

名園幾處好句留  
疎影離離翠欲浮  
冷豔描成半壁畫  
淡痕繪出滿庭秋  
暗移老圃煙三徑  
陰轉疎籬月一鉤  
恰笑樊川多逸興  
何由薄採插盈頭

梅魂

一苑梅花太寂寥  
枝南枝北自魂消  
孤蹤隱約依江店  
幽夢迷離到灞橋  
半夜鶴歸何處覓  
空齋雪冷倩誰招  
此生修得成仙骨  
環珮珊珊近復遙

燕翦

玉謝堂深燕語高  
頻來弱翦亂相拋  
衝簾應見湘紋斷  
掠水纔看穀影交  
翠羽一雙裁錦段  
紅襟兩下破花梢  
閨中漫欲停鍼問  
幾度春風守舊巢

鶯梭

如簧舌轉最高枝一點宮鶯出谷遲柳岸亂拋風似翦花湜斜織  
雨如絲不愁化去龍為伴應見梢<sup>來</sup>蝶被窺轉眼春光同片錦千  
紅萬紫乍晴時

蟬琴

誰撫幽琴薄暮天綠陰深處響寒蟬無絃似抱孤桐泣有調偏從  
獨杵傳流水幾灣彈暮雨薰風一曲曳殘煙居高時時誰人會海  
上成連久已仙

蛛網

涼颺纔送午晴移屋角纏綿結網遲新雨落花黏點點斜陽芳草

掛絲絲微痕着樹蜂應如密縷當檐蝶已知正是珠櫳來報喜恰  
看霽色上樓時

古鏡

冷魄掛樓頭而今伴月留塵煙經萬劫顏色照千秋鵲影年年射  
菱花歲歲浮故宮人在否相對定含愁

古劍

仗劍名流謝霜華剗匣中心交諸烈女血澱幾英雄繡澀龍光隱  
苔封虎氣融報恩兼報怨掛壁懷餘風

古琴

琴在人何在知音曠代稀松風萬壑遠山水一彈微尾想平郎鑿  
絃曾叔夜揮廣陵今絕響惆悵對金徽

古硯

一硯留千載消磨幾代人石交諸輩老壁友古遺民鐵面堅如故  
雲根拂再新元光知日謝贖此伴吟身

籠中鳥

豐羽不能脫伏頭劇可憐同人籠下寄無復向遙天  
放汝青雲裏騰身落照邊養成雙翮健瞬息好風搏

陸以恬

字敬安號定圃桐鄉人道光丙申進士杭州府學教授著  
有冷廬詩文鈔冷廬雜識  
光緒桐鄉縣志文苑傳公生有至性苦志力學道光壬辰  
舉於鄉丙申成進士以知縣分發湖北到省數月以父病  
酌公慮仕路險巇時有憂色即承志改就教職選台州府  
教授丁父憂服闋選杭州府教授以母老思鄉呈請終養  
咸豐庚申之亂避居鄉曲訓蒙糊口嗣見鄉人遵偽令蓄  
髮乃勃然曰烏默豈可與同羣乎遂挈家避至滬上流離  
顛沛幾不自存幸江蘇巡撫今爵相李公鴻章聞其名聘  
作忠義局董事資以薪水賊平後又為前護浙江巡撫蔣  
果敏公益濃聘主杭州紫陽講席甫及半年而沒公通籍  
改官後思著書立說垂教後人乃積清俸所餘購書數千

卷旁搜博采擷其精華炳燭之光至老不倦先王烏鎮分  
水書院台州近聖書院及後掌教杭州衡文課士一以清  
真雅正為宗士皆化之卒祀鄉賢祠

登涵山

一徑踏空翠不知身漸高溪山成勝蹟嘯詠屬吾曹  
捫壁尋殘碣提壺釐濁醪何當憩禪室暫息世途勞

晚發青溪

渺渺荒村外孤帆掛夕曛怒濤高拍岸怪樹瘦撐雲  
波影淡無色禽言寒不聞前村何處泊落葉正紛紛

村居雜興

偃息空齋外蕭然一草廬靜觀當世事徧讀古人書  
磨硯情何極持籌計獨疎時來北窗裏高枕夢華胥

歸興

此去真為泛宅行扁舟江上訂鷗盟酒從黃葉聲中醉  
詩向青山影裏成高枕連宵酣旅夢小箋沿路記歸程  
掉頭笑謝風塵侶圖史蕭然萬慮清

百丈雲梯未可階寒纒仍問舊生涯祇慚報國心終負  
且喜還山夢竟諧書卷隨身無恙在田園樂志有人偕  
卜居擬傍漁翁宅莒雲煙波處處佳

赤城雜書

祖德清芬守一壇軒極遺製尚依然登堂重認梁間字手澤存留

六十年先祖秋哇公司鐸臨海乾隆庚子

師門自受昔恩偏瞻拜空祠意悵然沈鹿坪師司鐸台郡最子舍

遺書零落盡不堪回首十年前

廿年舊雨漸依依首肯休嫌壯志違孔格鄉司訓臨海朝夕過從杯酒深談故

鄉事便教沈醉亦忘歸

半畝空園護短牆春來消息問羣芳閉門漫道閒無事排日裁詩

課正忙

古壇槐影鬱蒼蒼金碧樓臺擁上方自問名心銷已盡漫勞仙枕

夢黃梁

踏春山徑路天斜勝侶招邀羽士家西北高樓簾盡捲夕陽翳裏

望桃花

雙嶺峰前路乍分一聲樵唱隔林間秋陰滿徑鶴無語中有幽人

眠白雲

白徑巉巖步屐遲碧雲深處去尋詩夕陽欲合山光暝猶為泉聲

住少時

吳同年溫稼生比部

慘絕郵亭計天涯別淚潛羈魂千里外幻夢十年間少妾淹空邸  
衰親慟故山傷心江上雁同去不同還

憶作春明客深情獨我知聯吟花寓韻贈別柳牽絲豈意重逢日  
翻成永訣時千秋身後事珍重一編詩

劉園有序

湖北武昌府城內劉園乃明故藩遺址在將臺驛東北因

山而構建於乾隆癸丑吳白華學使題曰藹園通州劉繩

齋太守為作記

一徑穿雲入樓臺漾碧虛人為盤谷隱地是輞川居舊作藩王宅

今成處士廬不禁懷古意憑眺重踟躕

若負山林勝遊蹤且暫淹江聲走虛壁巖氣逼深簷古砌蟠藤曲

疎籬引蔓織好詩桐石賞寫景韻重拈

感舊詩一百首錄十首

羽贊給麻玉燭調老臣碩望冠羣僚傷心遺表無由達箕尾歸天  
恨未銷蒲城王文恪公訃

生平知己孰逾君中歲睽違涕淚紛一事夜臺差慰藉庭階玉樹

已凌雲巖比玉太守

翩翩文采眾文推晚始成名入鳳池五十年間如一夢那堪重憶



采芹時周鐵崖中翰

長楊奏賦氣凌雲，十載詞壇早策勳。夢醒春明何太速，衡文未了遽修文。周蓮史太史

鄉邦德望共推尊，慷慨捐軀報主恩。垂死罵聲猶不絕，獨留正氣壯乾坤。俞雲史太史

劉青田後數人物一鶴唳空聲遠聞，才學經綸縱難並。若論氣節轉輸君，端木鶴田舍人

飄然下筆語清新，名教持躬品更醇。奉母課兒兼信友，末流罕見此完人。計二田膳部

滿地兵戎殺氣多，身戕家毀痛如何。蕭條水北花南路，門徑傷心不忍過。張硯史明經

升沈官轍不堪論，琴劍蕭條返里門。三世清芬真不忝，南天遺愛到今存。星槎兄

清華望重鳳池班，潁水移官鬢已斑。精氣不隨形體化，斷縑傳玩徧人間。春霆兄

懷人詩一百首錄十首

相思渺渺隔江波，別後應知鬢已皤。歸阻兵戈留怯賊，一官辜負壯心多。鄭拙言學博

垂老依依首蒼盤萬山深處一壇寒路遠音問猶多阻欲盼重逢  
恐更難孔雅六學博

論文總角早相親此日睽違倍愴神等是流離君較樂比鄰來往  
有詩人李鶴杉學博

卅年幕府播聲華垂老投閒竟賒大好樓臺歸未得春風閒煞  
一園花沈伯淵學博

閒依冷圃課桑麻夢史塵詞筆燦花載得扁舟輕似葉煙波隨處  
可浮家朱又堉學博

詞宗兩代今名垂才藻翩翩濟美宜憐爾家貧親又老一官屈節

不辭卑汪還甫州判

插脚風塵氣自華高才貴族世爭誇登科七子剛周甲二百年來  
止一家許李博大令

昔日帝城花共看今日思君摧心肝其室則邇其人遠欲往從之  
行路難吳沅洲舍人

混蹟風塵識者難聊將才思託詞翰閨門酬和歡無盡絕勝梯榮  
作好官鮑溟姪

綵筆干霄氣象尊蘭臺視草屢承恩寒糴落拓嗟吾老盼爾重興  
駟馬門眉生姪

申江即事詩

撒卻豺狼窟移家海上來撥雲見天日近水住樓臺兵旅時方急  
鄉關事可哀所好<sup>也</sup>朋好集話舊且銜杯

對宇棲遲處家家巷陌通庭窪常積水檐淺易招風窗啓玻璃朗  
稍題字畫同一椽聊偃息游蹟等飄蓬

破碎山河外邊方拓壯圖名場百僚聚利藪萬人趨計較財贏縮  
遷流貨有無三吳田賦竭藉此助軍需

兼節南郊外森嚴上將營虛心收眾策偉略馭雄兵閩外揚威遠  
惟中決算精偏隅成樂土羣恃此長城

勸善重忠義表揚名永存遺骸委溝壑正氣塞乾坤一死綱常繫

千秋俎豆尊會看鋤寇盡告慰九原魂時余奉蘇撫李中丞命司採訪忠義之事

舊是荒涼境今騰萬竈煙木排河埠穩磚甃水溝堅禁每嚴篝火

餐難汲井泉最愁無溷廁遺真溢牆邊

地勢經營固功非自一朝城樓高出屋濠水遠通潮門戶關防密

川原候望遙登臨增感慨兵氣幾時銷

薄游大馬路初日上郊垌雞犬人家聚魚蝦海氣腥市童錢慣數

野老擔齊倚一闌歸來後徐烹午膳馨

海國多豪士桓桓共結儔輕車馳遠道巨鼓擊層樓棒短常持手

冠高每戴頭相看，不相識莫辨語。啾啾  
輪木因車設，船惟藉水通。不圖人力勝，翻仗火威雄。縹緲疑凌漢，  
奔騰豈借風。何當浮海去，三島訪仙宮。  
珍重時辰表，懷藏雅俗同。材良成器美，人巧奪天工。闔闢機無滯，  
循環用不窮。鳴鐘留鉅製，技術顯神通。  
琴劍飄零後，天涯作寓公。才疏難徇俗，老至轉求蒙。搜討異書富，  
晤言佳士同。吟成聊遣興，一笑對春風。

### 盧之貴

字覺晨，號菊人，桐鄉廩生。有筆珊山館吟草。  
光緒桐鄉縣藝文志：覺晨，家承家學，文有經術。為吳學使  
鍾駿所賞拔，生平操行端謹。里中巨室爭延為塾師，著說  
文引經攷異八卷，續編六卷，惜未獲一第而卒。

### 金陀園懷古

王業偏安不可追，前賢勝地寄遐思。金牌殉國心悲憤，銅爵傳家  
力護持。裴島生雲遮館閣，范湖流水過亭池。勸農冠蓋留遺蹟，弔  
古城南夕照時。  
競傳門第是侯王，水木清華徑未荒。倦圃鶯花知尚在，平泉風景

略相當一時遺愛留殘碣萬古精忠表舊坊二十畫圖猶彷彿不  
禁嗟歎話滄桑

擬王右丞藍田山石門精舍

落日放舟好水與山相環探幽路忘遠此境非塵寰置身入雲表  
去去誰追攀俯茲一灣水上有千疊山舍舟連步走石古苔紋厚  
修竹緣溪邊飛瀑奔澗口相看別有天策杖時昂首忽爾到山前  
老僧來握手追隨有樵牧問訊雜童叟一徑通禪房雲木環左右  
山月光漸臨再行蹤罕有相與循路途後約結良友

嚴節母陳太孺人徵詩

日者驥村翹首望九重旌表名流芳實哉嚴母德音藏巷歌  
衢謔徧梓桑憶昔和鳴卜鳳凰案齊眉喜相莊忽分鸞鏡悲空  
房絕粒即欲殉夫亡上思二代老姑嫜下遺孤兒載寢牀若非隻  
手扶倫常仰事俯育兩茫茫殘喘苟延心暗傷堅持苦節勵冰霜  
媳兮代子藝福梁母也兼父教義方到股療疾起膏肓一片孝心  
格彼蒼賑貧推產持權量貧吝見之走且僵其餘細事尤精詳父  
老為我言之長五十年中艱苦嘗中悃丈夫家業昌陶孟歐柳堪  
頡頏名垂彤史千秋揚宜乎聖主闡幽光發帑推恩許  
建坊

田家

村居多樂趣遙隔市塵華茅舍護桑柘柴門開稻花雨晴占歲序  
雞犬足生涯隱約疎枝露幽棲有數家

山家

隔斷紅塵後頻年住故山攀蘿雙足健采藥一身閒  
猿鶴聊攜伴雲霞自掩關此中有真意俗慮已全刪

漁家

泛宅浮家裏漁舟望若仙門臨蘆荻岸身結水雲緣  
風雨蕩雙槳兒孫聚一船鱸魚欣入網沽酒醉陶然

酒家

玉壺春待買有客叩柴門紅友釀新熟青旗風亂翻  
船停桃葉渡人醉杏花村小市三家認明朝再舉罇

讀孟東野詩集

古今負才子聲自不平起假託文辭嗚嗚其不得已東野武康人  
五十成進士作尉往溧陽何能大治理後薦有昌黎寥寥一知己  
鬱塞寫心胸弗嫌為小技高天厚地間卒以窮愁死種稻更負薪  
或譏耽山水髣蘇品其詩寒與島瘦比復有元遺山詩因尤深鄙  
此實非真評論人沒內美朗抱情尤高浸淫純漢氏靜水踪鱗無

直木恬翼止寓意羈旅行平生括大指劇目還休心刻削有如此  
語從真性流良哉得公是

讀五代史

梁王英特祚移唐五鳳樓高建洛陽結黨黃巢曾魄落抗抗赤族  
每心傷象迎已見開陰關難關何須仗鐵槍馳入敵軍馳國璽未  
能了事轉憂惶  
矢三還廟慰先人天下方瞻氣象新提帽負囊逢后怒醫瘡剗肉  
苦民貧九經頌發文章煥六畏分明諫疏陳可惜石郎旋破膽北  
行勸駕竟蒙塵

北朝立帝借干戈割獻諸州藉議和苑苑調鷹終拒諫梓宮式燕  
遽行歌紙錢投沒機心幻鐵硯期穿苦志多痛從黃龍由負義空  
教十萬劍橫磨

富國強兵冠外藩出師正位定中原仍稱天福昭忠節欲括民財  
納諫言杖下合歡多變法囚經淨獄鮮蒙恩重違賢母親辱小將  
相乘睽啓禍門

黃旗被體擁南行神器非關以力爭虎拜迎來朝主母牛租罷去  
裕民生鑄錢毀佛公分利刻木為人廣勸耕宋運無如興莫遏袖  
中禪詔穀備成

登爰山

語兒四面平坦蕩無山阜東北路繇延突然一培塿憶昔有爰基  
隱居離俗垢學道得真詮仙班結為友居人四五家棘樊固窗牖  
雞犬聲相聞耕鑿勤隴畝彷彿桃花源衣冠樸童叟卜氏為世家  
馬鬣封是否松幹植萬株濃陰環左右地脈靈秀鍾詩社結亦久  
推敲發雅懷唱和情誼厚暢游惟貝瓊三春日丁酉度陌還越阡  
攀躋攜旨酒踞石共高眠沈酣醉大斗繼造來青堂雙甌茶適口  
向東途漸夷緩緩連步走古井二仞深藥洗道人手勝境徧搜羅  
扶筇昂皓首欲置讀書牀幽奧抵深柳後入為史官豈能解組綬

此樂難再追山倩老僧守我來快登臨古蹟非罕有縹緲氣凌雲  
謾謾風亦受何啻天姥峰高曠孖抱負約伴陟其巔切莫瞠乎後

枇杷

迎風碧玉乍抽時漸覺纍纍實滿枝虛色迥然休誤橘柄形宛若  
合稱枇杷開來含北頻攜酒老去溪東儘賦詩重與園丁緝舊譜蠟  
兒佳號有誰知

夏來風味十分嘉小摘筠籃隱士家檉柿芳名輸綠雪蒲萄豔質  
遜紅霞千九綴樹濃承萬里懷人落盡花試看登盤桃李並莫將  
塵籠客品枇杷



夏日田園雜興

疎簾清簟好相隨  
長夏山莊事事宜  
螢火初流採小扇  
蠶花再熟賣新絲  
沿隄綠柳鳴蟬噪  
隔渚紅蕖宿鷺窺  
謝却喧闐車馬客  
陂塘散步且吟詩

獨樹當門野徑斜  
竹籬茅舍有人家  
鷓鴣閒逐溪邊浴  
蛛網晴添屋角遮  
好引松風開舊釀  
為收荷露煮新茶  
晚來消遣饒幽趣  
尚有東陵五色瓜

陸憲曾

字慎旃號鯤濱桐鄉諸生有繕性居詩草

孔憲采雙溪詩滙君應道光辛巳鄉試闈藝已入彀以詩  
累危得復失遂抑鬱患咯血病桑舉業援例為吏州日需  
次畿輔以能詩名為上游重子芝祥入廣東籍同治戊辰  
翰林

易水弔荆卿

萬死無迴顧荆卿亦大難  
囊中利匕首眼底白衣冠  
熱血一朝灑悲風終古酸  
英雄成敗異不必咎燕丹

保定秋思和綸齋三弟秉樞都門秋思韻

有弟長安市上游  
合併蹤跡海中漚  
著書同作千秋計  
識字常擔

萬古愁少日有才期用世異鄉無客不悲秋阿兄潦倒今尤甚更  
許添脩五鳳樓

岳忠武王墓

沈沈鐵像跪孤墳一代賢奸衆目分只為南軒能幹盡青山寂寞  
曲將軍

反游仙

卿媿秘冊費深藏只是黃芽絳雪方易造玉樓難作記始知人世  
有文章

露筋祠

曾從江上弔曹娥又挂輕帆此地過庸行千秋歸女子死貞死孝  
兩難磨

寄懷定國叔

百里知難屈俊賢天台策杖望如仙平生道學兼文藝不獨才名  
媿鄭虔

即事示陳蝶園大謨內弟

花事更番過年來不忍看高堂憐我瘦穉子樂耶寬病至心先怯  
眠遲夢亦難感君情誼渥頰為勸加餐  
漫說加餐飯憑誰慰寂寥光陰春覺短愁緒酒難消院靜鳥聲在

簾垂人影送癡情與真意還自把詩描

詠車具四律

一桁簾櫳三尺長縱教不捲豈留香  
拳來風定無塵垢垂處天寒  
有雪霜與我周旋同號舍此中閑  
置等閑房憑伊遮却妍媸相擲  
果情懷付淡忘車帘

垂垂尺幅蔽轅端赤日馳驅不畏難  
裝點鳴驄誇夏篆依稀房馬  
傲周官依容僕御聯肩坐遠放山  
光側目看底用紫絲矜富麗担  
涼得此便心安車幃

反反車箱位置宜文茵自昔詩詠  
風詩豪情一吐傳千古美睡三更

曲四支破帽殘衫容轉側匡牀錦褥漫  
尋思春英飄墮無多地也  
勝尋春落溷時車茵

遙溯軒轅創制精飄蓬宛轉劇逾征  
良工製取三材備思婦心期  
四角生聲逐馬蹄尋遠近相同蟾魄  
比圓盈箇中甘苦無人喻幾  
許工夫斷得成車輪

和李鶴杉奉懷元韻

頭顱如許嘆蹉跎一樣傷懷詠蓼莪  
前年予悲夫怙君人到中年  
亦遭太夫人之變

歡樂少天於才士折磨多脚躡腰版  
作塵吏西抹東塗稱阿婆  
得科名從游

日眾故云  
身世相看判清濁各將心事託高歌



雙魚前日至語意多規箴節操在嘉王氣誼投斷金忠信苟不渝  
聚散皆足欽相期各努力持此千秋心

醉後題壁

花開天下春花落天下秋忽春忽秋等閒事海水日向東南流海  
水東南去不息笑指浮漚起復沒醉攀松樹當龍騎騎向青天弄  
海月

古墓

北邙山高嵯峨累累古墓何其多行人到此日已午陡覺陰風起  
塵土殘碑剝落字不清尚書學士無姓名東西翁仲眠幾許白楊

蕭蕭作人語

峴山

繫棹峴山下蒼茫對夕曛桃花寒食路芳草美人墳嵐翠濃如雨  
湖光遠入雲殘碑空讀罷杜宇不堪聞

市义守風用東坡大風留金山詩韻

湖邊鷓鴣向風語白浪如山斷人渡觸船砰礮忽有聲激起回波  
作飛雨亂雲一堆天際流老魚幾箇水中舞折桅始信石尤狂繫  
纜一任河伯怒篷窗危坐獨高吟險境身嘗何足數晚來舟子酬  
神去听旁自打鼗鼗鼓

趙家堰

如此波濤險長途益憚勞風奔沙岸潤月傍嶺雲高  
旅宿留孤店狂歌對濁醪今宵行不得何處問輕舠

盱江道中

策馬盱江畔今春雨度過亂花迎客路雙燕浴晴波  
小憩尋村落重來認澗阿是誰烟樹外忽唱采茶歌

道出武林查曜庭別駕招飲書齋流連竟日別後為長歌寄

之

我生偃蹇寡所歡頻年來往之江干崎嶇世路不得志悲歌清淚

常汎瀾間逢奇人一青眼投交往往披心肝昔年風阻鄱陽路舟  
子大呼公無渡篷窗遂得識荆州乘車戴笠腹心布聯吟對酒懷  
古人指點落霞與孤鶩豪情彈指曾幾時荏苒流光走烏兔今年  
復遇錢塘隈寒濤落日同沿洄我時千里歸去來蹇驢破帽行徘  
徊風塵之色滿顏面踈狂意氣還如雷感君酌我竹葉酒婪尾入  
手傾深杯高談雄辨竟脫畧為浮大白抒胸懷平生素抱兀塞意  
到此忽如浮雲開得一知己可不恨何況推獎逢高才先生少走  
萬里天蓮花幕府稱名賢胸羅甲兵侔小范筆挾風雨超史遷壯  
心未已驥伏櫪唾壺擊碎神欲顛酒酣撫膺復自歎青燈雪案年

復年棘闈文戰既失意卞和獻璞誰深憐男兒通塞會有命逢場  
竿木且隨緣為雲為龍未可定安得日日相周旋

登開化寺塔望海歌

篷窗兀坐同枯僧明發人共烏鴉興捨舟來從富陽道肩輿意氣  
殊飛騰浮圖矗立江之濱一往鼓勇褰衣登循墻忽作蟻磨旋緣  
梯似學猿猱升絕頂憑陵空八表脚底羣山一覽小蒼茫四顧閒  
無人此境已知同到少身世飄零類斷蓬登臨空自傷懷抱平生  
兀鼻尚奇氣幾欲排空問蒼昊海門東望青濛濛濤頭一綫浮寒  
空昨夜羲輪浴海中朝來霞光連江紅珠宮貝闕時湧現照耀但

見金芙蓉衝波蜃氣尤變幻直上化為垂天虹平鋪天鏡浸星斗  
跳躑雙丸等芻狗雲起覺有神龍飛雷鳴應是鯨魚吼包涵天地  
羅四維未闕闕洪荒已先有不知四海以外更何處奇想惜少談天  
叟壯游到此洵奇觀層層倚遍紅欄干塔檐鈴鐸向風語似訢興  
亡聲激楚江山半壁已銷沈人代茫茫閱今古高詠題詩最上頭  
墨花洒作諸天雨

孤山探梅

咫尺湖山路幽尋到上方烟痕微著樹雪意澹生香一鳥下寒翠  
孤峯明夕陽逋仙何處往回首白雲鄉

宿福田精舍懷香圃

偶共閒雲到禪房一榻留佛香清入夜詩思冷宜秋微雨嚮敲竹  
疎燈明小樓有懷隔溪客烟水渺含愁

海昌俞子石歲暮過訪見贈用范石湖酬胡元之韻以答  
客彈青桐琴清風吹我襟一彈再鼓意高遠海水激盪宮商音珍  
珠小字值千金詩情彷彿東海深剪燈相對夜不寐梅梢凍月驚  
寒禽明日別離長太息雲龍上下情何極

渡彭蠡大風作

狂風吹水作山立百尺洪濤捲飛雪湖光欲與天爭奇上下驚波

一片白孤舟一葉湖之中周三百里無終窮奔流疑有海童出鼓  
浪直與陽侯逢既無畫扇渡江施幻術死生聊復憑天公胸吞雲  
夢常八九縱觀到此何空濛痛飲意惟澆塊壘豪吟聲欲摩蒼穹  
恐驚蛟龍來竊聽棹頭四顧心中忡忡須臾風息鄱陽路暝色蒼茫  
日熏暮一彎新月照篷窗艣枝搖夢浮江去

九日偕俞生香作

日落楚天秋征鴻去不留青山游子屐紅樹酒家樓江水分章貢  
城形接斗牛題糕憑健筆莫為異鄉愁

山塘紀游和韻



盡日山靈笑客忙也攜雙槳向橫塘生來南國憐紅豆畫出東風  
是綠楊春水波添空怨別旗亭酒醒尚餘狂良辰樂事君須惜莫  
待重游鬢有霜

寒食雨中泛湖

雨無其極風淒淒池蛙閣閣林鳩啼早梅一半開已落西冷橋畔  
枯楊稀小桃帶雨亦彈淚春痕吹滿蘇公堤良辰命侶強排闥蓬  
船瑟縮同鷄栖但聞柔艣作欸乃糝糊不辨東南西亂雲如墨潑  
不止湖波拍天天為低遙山一抹影全失跳珠錯落烟光迷冰壺  
濯魄快奇絕上下一色青玻瓈雙燕飛歸愁失路羣鷗爭浴浮前

溪扁舟彷彿在圖畫畫筆絕似雲林倪晴湖不若雨湖好見明張  
急覓剩語為詩題

湖上春游口占

粼粼春水滿湖澄柳眼初開半未曾幾日畫橋人不到東風吹綠  
過西陵西冷一名西陵

踏春橫慣向裡湖堤絲雨溟濛路欲迷只恐春光容易老碧桃花外  
一鶯啼

偕金雪庵劉小美笑由湧金門至茅家埠游靈隱宿天竺翠竹  
禪房遲明下山復尋九溪十八澗諸勝歸途擬謁樊榭先生

祠不果得詩五首

名山久相待良友頗不俗布鞵及青鞵朝來同脫結東南山與北山  
遠望露寒玉湖波浮影清昨夜新雨足篷窗兩三人鬚眉一齊綠  
烟痕楊柳低雪點鴛鴦浴亭臺罨碧波巖岫媚紅旭好風從東來  
悠然暢遙矚舍舟復登岸路轉峯回曲銳進衣或褰側行趾相觸  
有時石上坐澗飲水堪掬笑彼下方人風塵徒局促  
老猿呼不起撲面只蒼翠怪石松攫蟠凌空似龍戲烟雲變俄頃  
奇境難盡記拾級幾百層峰頭見僧寺樓臺金碧中天遣佛位置  
泉聲靜自喧寂然無世事蒲團試趺坐妙悟見心地喧寂兩不關

吾自適吾意但愁風雨來山勢欲飛去

空山起眾陰前望日已旰投宿指禪房叩門石橋畔新筍足供餐  
流泉任清盟舉頭天宇近屋角低星漢列宿正參差餘霞尚璀璨  
須臾山月生樹影忽凌亂宿鳥自驚起鐘鳴夜方半明日向何嶺  
燈前同預算老僧聞客言相對亦嗟讚煮茗幾曾眠徘徊竟達旦  
九溪十八澗夙昔重其名清晨別精舍迤邐下山行衝寒人語少  
樹杪初暘明數里斷却落磊砢山無平一轉換一境處處溪澗橫  
小橋架其上對客峰突迎峨峨亂石疊謾謾松濤鳴惟聞空谷中  
樵斧時有聲

歸途餘興在懷古情難已曾讀樊榭詩高山久仰止著作勉等身  
超然謝金紫侍妾比朝雲性復耽經史蘆簾紙閣間長嘯自隱几  
秀骨本天成韋柳差足擬如何後來者浙派謾相訾我欲訪叢祠  
登堂一瞻視落日已西銜牙灣路空指先生祠在武林門外牙灣  
黃山谷祠旁見蒲褐山房  
詩逸韻渺層巒遙情託澗壑喚渡急歸來夢魂繞烟水

池上

夜涼雨欲來池上稀人跡梧竹自蕭蕭一螢點空碧

宿白衲庵

此是雲深處茆庵夜寂然好山多佛住涼月得秋光身世真無著

文章亦浪傳何當隨老衲高枕向清泉

吳越王射潮歌

江潮欲來不見潮海門先有陰風號初起似綫漸矗立足練直將  
長天包前胥後種事難考惟見萬頃多奔濤滕六暗遣雪飛下潛  
龍戲出珠亂拋旋轉一氣勁於石還疑坤維皆動搖有時乘勢或  
斜走海水為害延四郊錢王本是英武質保障久向東南國喧闐  
鼓角能驚人叱咤風雲亦無匹是時海潮排山入高噴欲使鴻濛  
濕三千强弩一齊集白鏃銀濤同一色彎弓飛羽忽追及千古靈  
潮竟敗北天吳海若騎不得但聞水鬼嗷嗷泣錢王劍珮獨山立

天地精華為摧抑以鉄鎮水不可測嗚呼此事誠奇特潮患遂息  
成錢唐奠安城邑如苞桑信存子午自來去素車白馬無敢狂緬  
憶懷舊跡已千載英風浩氣人相望至今折錢沙中見猶頌當年武  
肅王

登吳山偕蓉境作

與君直上大觀臺絕頂蒼茫鳥道開一綫江流羅刹盡萬山雨擁  
會稽來乾坤吾黨容狂醉湖海誰人識霸才張有湖且向白雲呼  
鶴下丁仙亭外共徘徊

春日偕俞理齋泛舟秦淮至夜始歸醉中放歌用昌黎寒食

出游韻

嗜奇之癖本同病肯負秦淮水嬉盛直提金勒坐花驄鞭絲帽影  
臨波映扁舟買自桃葉渡恥逐吳儂簫鼓競良辰况復遇良友勝  
地同游足觴詠鴨頭新漲雨初晴蘭漿徐搖日方正人生行樂須  
及時回首華年已難更即今相對尚青衫窮達何妨委時命折得  
花枝當酒籌醉來更攜玉麈柄江山人物助清談一事差強堪自  
慶曠放誰如阮步步兵風流不數王子敬無多名迹六朝餘近水  
樓臺最幽賞但逢佳節且銜杯安用清濁分賢聖鍾山烟景暮蒼  
涼絲竹聲中哀樂未併身世空憐類燕巢英雄未許馴龍性他鄉會

合亦何常眼底繁華盛豪橫畫船處處掠波回銀燈白月光齊迸  
捲上珠簾一片春中流照見明如鏡雲鬢霧鬢暗香來洗盞重酌  
子為政殘樽欲將淮水添楊柳風多襲衣勁夜深共宿板橋邊刻  
燭猶嚴作詩令

板橋雨夜

誰家樓上罷吹簫深院無人夜正遙檐馬風多聽不得一燈青照  
雨瀟瀟

登北固山却寄金陵諸子

昨自京江渡峰頭策杖停亂山沈曉霧高閣摘殘星慷慨心空壯

蒼茫涕易流零由來天地大身世一浮萍

夜過古山寺

片月傍雲升禪房夜氣澄冷螢粘落葉野鼠瞰昏燈世事殘棋在  
勞生短鬢增蒼涼無限意空自對山僧

題秋江畫冊

疏花繞岸開渺渺凝波下畫出烟江秋夕陽明蟹舍蓼花  
霜白水濛濛沙洲雁影滅夜深潮欲來風捲半江雪蘆花

汪熙

字學文號破牆烏程人布衣有破牆小草

張元吉焦桐詩集破牆本號槐廬嘗過古寺有古佛坐明月亂蛩吟破牆句人遂呼為汪破牆平生以詩為命三句九食吟嘯自若每一詩成必就朋輩商榷故所造益精稿中五言古詩無意學陶自得陶趣卓然可傳

歸雲庵

弭棹向山行振策陟崖壘林空日色凝路滑苔痕薄紅泉隔竹鳴  
清磬隨風落秋氣蒼然來桂花滿幽壑念昔孫山人挂瓢此栖託  
精舍留巖阿荒墳隕寒籥短碣自空在高風不可作薄暮片雲歸

飛來雙白鶴

宿畫溪山家

行行欲何之遙望畫溪曲山繞凝<sup>微</sup>路多暝烟滿層麓徘徊遇牧童  
引我至空谷隔離鷄犬喧林際露茅屋閒花當戶明細草沿階綠  
老翁情更厚留客烹葵熟列坐向前軒晚涼時在竹夜來人語靜  
掃榻牕下宿支枕夢難成河漢挂喬木

山中早起

露氣淡孤燈村遠人語寂披衣啓柴扉殘月樹梢白時聞雲際鐘  
知有開士宅攜杖擬相尋空林斷行跡

尋問松庵

鐘梵嚮何處白雲滿澗壑空山自無人滿地松花落

古寺

荒庵僧住少寂寞枕溪旁古佛坐明月亂蛩吟破牆經殘猶在榻  
爐廢不焚香獨坐禪闕下宵寒露滿裳

村居

種桑西溪上桑長蔽我門我心了無事所喜書卷繁執卷且誦讀  
呼兒開南軒牕外好風至柳梢羣鳥喧誰人知此意悠然無一言  
倦來隱几卧新月挂黃昏





斷雁下蘆汀風吹不可聽  
離人京口去日暮獨揚舲  
潮落江天白山連海氣青  
莫將長劍倚蓮幕易飄零

和宋小茗先生泛溪作

明月溪上來村邊吠寒犬  
扣舷遶隄行天長一帆遠  
何處是爰山白雲蔽蒼巘

游吳興諸山

經年不見山見山輒生喜  
况復新雨霽放棹碧溪裏  
柳梢墮春雲水流清見底  
幽鳥解留人一路鳴未已  
日暮澹忘歸峰峰夕陽紫

西湖

侵曉蘇隄望春流蕩畫橈  
疎鐘湖上寺殘月柳邊橋  
路繞鶯聲靜山迎客渡遙  
杏花何處店隱隱酒旗招

葛嶺

湖光忽浸山艤棹覽清景  
石徑白雲封葯爐紅雨靜  
仙人渺何往老鶴踏松影  
獨立弔遐踪夕陽下西嶺

尋烟霞洞

白雲遮<sup>微</sup>忽斷何處洞門通  
一路少人跡梅花香滿空  
偶然逢老衲同上翠凝中  
却聽松濤起泉流萬壑風

送李樗園之江右

切切辭朋友  
迢迢赴江路  
帆移浙水雲  
日落楚天樹  
此別愁難已  
此後何時遇  
伫立不見君  
匡山迷遠霧

暮歸

月出溪路白  
幽人踏雲歸  
露重霏微溼  
暮寒侵我衣  
烟鳥嚮叢竹  
風螢照柴扉  
老妻折藜藿  
煮飯聊充饑  
飯罷燈下織  
夜深語依依  
訪張夢廬即題珠村草堂

幾日園林裏  
梅花香欲開  
雪隨殘臘盡  
風帶早春來  
人靜唯調鶴  
門閒不掃苔  
知音應可遇  
肯抱素琴回

漫興和鶴舟

高卧掩柴荆  
村居斷送迎  
暝烟溪樹合  
秋雨石苔生  
身自安貧逸  
心從入道清  
讀書終有益  
深處不求名

渡江

片帆飛挂大江風  
踪跡飄然類斷蓬  
瓜步人家春水外  
蕪城烟樹夕陽中  
波濤空自將身涉  
霄漢何曾有路通  
雙鬢凋殘鄉國杳  
唯憑尺素寄鱗鴻

和春園秦淮水榭作

春來偶向秣陵游  
長板橋邊一艫舟  
殘雪山城明似月  
疎燈水閣冷於秋  
青衫詎為聞歌溼  
綠鬢終添作客愁  
珍重吳姬頻勸酒  
醉

餘歸夢落淮洲

天津早發

瘦馬殘衫黯自傷  
天寒早起促行裝  
雲紅遠海初生日  
草白平原半積霜  
吳下舊游憐久別  
燕中奇士類佯狂  
須知不為黃金至  
酒後高歌向市旁

燕中晤肅堂

去國三千里相看鬢盡華  
與君同作客顧我獨無家  
薊北多情雪江南正落花  
不堪鄉思滿春暮動深嗟

過西林贈朱道士

日斜見西林別墅空  
迷迹夢斷六朝人  
池塘春草碧  
謝靈運別墅在西林  
夜來禮斗罷君自抱仙骨  
獨立向空庭  
紫薇花下月  
庭有紫薇花時盛開

孤山看梅

去年踏雪鄧尉道  
山靈怪我探梅早  
今年艤舟西湖濱  
孤山梅花如笑人  
人生百年行樂耳  
花開不飲更何俟  
攜酒徑呼逋仙來  
白雲深處巖扉開  
忽焉老鶴隔花嚮  
長嘯獨向峰頭上  
天公特為清詩骨  
夜挂湖山一片月

題蓉鏡湖海詩歌

君家花外集  
蒿村先生有名重足千秋誰識才人後仍多博物流

風塵雙劍匣湖海一詩樓我欲低頭拜枯桐幸見收

時方照定拙稿

西溪

斜照雲外山明滅西溪曲鄰叟兩三人欣然聚茅屋見我徐步歸  
相邀對籬菊煮茗坐高談遙指禾黍熟月白知夜深涼風入階竹

池上

炊烟出深樹返照明池東柴門一倚望梧竹多清風故人攜筇至  
酌酒樂融融幽懷自無極不復知窮通但得張仲蔚共居蓬蒿中

李日熾字鶴杉桐鄉人道光乙未科舉人衡

光緒州府學教授著竹素山房詩文鈔  
性強冠遊記雖至暮年十三經背誦如流著作宏富尤長於  
詩弱冠遊庠以長鬣呼餘皇賦受知於李學使宗昉由是  
名噪遠近春闈屢薦不售乃以大挑就教職授壽昌縣  
訓導俸滿推升衡州府教授所至提倡風雅士林翕然宗  
之光緒丁丑重游泮水年八十卒

出門示家人

貧裏辭家更惘然春愁萬斛擁吳船親朋祖帳情原重兒女牽裾  
別亦憐此去求名天尺五最難得信路三千慈親已替姑頭白

勉蕭鹽仗爾賢

吾母雙目不見  
姑母年已就衰

初至吳江作

鶴杉即博詩稿甚多  
未見全集茲僅從北  
行吟記中節錄

百里吳淞路吟詩興未降風聲驚笠澤帆影接平江山郭霧中斂  
半鐘煙外撞故人相待久心事話蓬窗

### 過丹陽縣

路出丹陽縣行行遇順風詩情飛鳥外心事布帆中自笑傲名客  
爭如垂釣翁相看爭渡罷沽酒趁辛豐

### 渡江作

東風吹我上長安此日江行眼界寬千里浮家纔破浪一川斜日  
正憑欄碑間鶴焦山有瘞鶴銘碑自何年瘞塔外雕從絕頂盤兩點金焦  
無限思碧天望盡水漫漫

四面常如列畫屏漫誇滄海昔曾經雲連蒜渚無邊白山向瓜州  
不斷青天塹北來誰得渡大江東去此揚舫斬王事業今何在望  
帝聲中不忍聽

### 江都謁董子祠

矯矯純儒漢代尊麟經述作有專門二王畢竟驕能化三策從知  
學有源家令智多囊易竭賈生疏上淚空吞何如自擅千秋業今  
日祠堂尚閉園

### 邵伯道中

關河放溜幾時休望裏洪波拍岸浮柳帶含煙縈驛路酒旗和影

落春流沿隄築障蘆堆雪傍水為家屋近舟明日片帆又何處驚  
工指點說高郵

初乘車至黃河岸得一絕句

二月黃河水已殘京華北望正漫漫南人不識輪蹄苦今日方知  
行路難

車中遇雨作

騏驥蹴踏苦不早騰驤天衢暮年少去歲始充觀國賓敢誇意氣  
出雲表驅車夜半出門去躑躅長途行未了荒雞一唱霜正寒羣  
馬亂嘶月將曉祇謂人事有變遷豈知天上亦杳渺忽然黑入太

陰中雷轟電掣風雨掃上淋下漏征衫溼身如槁梧頭蓬葆局促  
應憐轅下駒羈棲還類籠中鳥從來人生貴適意何苦區區名利  
擾陰晴反覆無定期須臾東方日杲杲輾轉相依薄笨車夢醒已  
過眾興道

題眾興旅店

行役不辭瘁蓬廬即是家舉頭惟皓月撲面有黃沙野館花催信  
郵程柳報衙輕裝真草草辛苦向天涯

花朝日宿堰頭和壁間韻

纔脫征衫把瓦卮江南風物最堪思小桃人面春三月楊柳旗亭

笛一枝山店有花皆駐馬酒家無壁不題詩日邊舊友如相問修  
稷良辰是到時

觀壩河爭渡至晚始得登彼岸

微雨灑清晨征夫戒前路行行至壩河嚴限恐程誤臨流各爭先  
駕駘常卻步仰視浮雲翔奄忽互奔赴輸彼一孺子塞裳徑先渡  
策蹇行水中不羨千金軻自古成輿梁王政有先務嗟彼司牧者  
不為民瘼顧何不多造舟役夫急召募德比國僑輿恩流廉公袴  
吾行日以遠故鄉渺雲樹阮籍悵途窮伍胥愁日暮驅車上長安  
執鞭亦欣慕

經荀子墓下作

周末儒宗在棲皇老一生蘭陵推絕學柱史合齊名法術傳應誤  
斯文擇未精摩挲千載碣弔古有餘情

山東道中

攬轡來東道春寒夢醒初天容開海岱地勢劃青齊戀棧看餞馬  
誅茅待葺廬沿村惟說餅一笑食無魚

兗州道中即事

客到題門鳥不凡寄書郵在未開緘新晴嫩點桃花粥夾道香飄  
杏子衫野店春寒頻費酒小車風利慣張帆

北人車上多張布帆亦一奇也晚來

煙景如何似幾點遙峰夕照銜

滕縣懷古

叔繡遺封在人煙自昔稠遠山橫翠嶂名酒辦青州井地榆錢滿  
平疇麥氣浮莫嫌福小國車馬九衢流

謁滕文公廟

驅車古滕國平原一以眺叢樹鬱蒼蒼中有文公廟戰國無賢君  
詩書忘夙好秦趙稱縱橫齊楚競攻盜區區行仁義偃王卒貽誚  
不謂卞正封世子特英妙有志復古制迂道謹受教行政雖不行  
潤澤思微效我懷井田恩偏隅溯遺貌驅馬出城去一鞭送殘照

兩輪車歎

南人利乘舟車行多坎坎坷仄兩輪間位置難貼妥仰臥忽旋右  
俯伏又墮左行地泥填墳登山石磊砢似紙蒼蠅鑽如繭春蠶裹  
跼蹐有百端輾轉無一可薄暮息征驂前村已篝火

魯北道中行風口號

入境泱泱起大風焚輪盡日捲飛蓬雲連海岳天空闊樹接幽燕  
地勢雄奎宿分躔常拱北河流無水不朝東煙光一覽渾無際遙  
指青青九點中

過河間府



纔過獻縣又河間望裏孤城四面環野闊風沙連趙那天長草樹  
接燕關顛危但覺登車苦閱歷方知涉世難縱有錫簫聽不得幾  
人能得客中閒

趙北口長隄界河楊柳成陰四望一碧頗有江南風景口占

四絕

風帆沙鳥日相過一道長隄戒兩河行到溪山最佳處故鄉無此  
好煙波

垂楊裊裊繞芳隄一面東風送馬蹄向晚停車回首望青山數點  
夕陽西

九十春光半已消北行無處聽錫簫誰知閱徧江南景猶有鶯花  
似六橋  
四面無時不畫圖載將春色到名都鮮鱗一尺漁翁獻博得今宵  
入饌無

二十里鋪曉發得五絕四首

城柝遠猶聞風燈明不滅仄徑碍車行老樹當人立  
深宵露氣清窮檐客卧靜小大聞人聲隔籬犬燈影  
我夢正到家征軺已聞鐸披衣出門去殘夢馬上續  
垂簾時默坐閉置若新婦殘月上疎林照見趙北口

徐君虛舟跨驪先至都下有贈

策馬皇都去春郊紀勝遊暖風搖柳響曉日上蘆溝逆旅三句駐  
輕裝百里留訪凡情更切不盡話綢繆令兄君青時官農部

初至京師作

葱籠佳氣鬱森森宮殿岩堯聳百尋萬國車書通輦道九門雲樹  
閣春陰觀光久切凌雲志及壯纔憤望闕心此地去天真尺五欲  
從韋杜結知音

閨中贈莊鏡湖同年嘉善人

同鄉更喜是同年沉復垂髫津水聯丁丑歲試與君同受知帝里  
於李芝齡夫子領邑庠

三春同把臂名場兩度得隨肩千言下筆無餘子四海論文證夙  
緣舊雨重逢應有意欲教同上大羅天

贈端木鶴田中翰

歲星遊戲任人間車馬盈門自閉關一架藤花留散吏十年薇省  
話清班海隅應詔恩原渥日下信書老未閒料得韋編三絕後等  
閑事業付名山

留別徐廉峰夫子

登龍客到仰門高愛士渾忘吐握勞南路家聲榮甲第西清才望  
重詞曹風儀自覺冰壺朗月旦曾將玉尺操江左文章京樣好一

時新詠豔簪毫

之江校士意如何海底珊瑚一網羅曾向項斯誇滿口不關司戶  
未登科感恩自在窮經久知己相招入社多欲到元亭頻問字掃  
門心力敢蹉跎

金樽檀板鬧初筵長揖同袍喜拍肩公自文章兼福澤我窺風度  
識神仙名傾元叔登朝日恩重昌黎薦士年到處憐才情獨切一  
生青眼喜常懸

夢熟櫻桃客路寒浮生去住總無端風塵又作三年別沆瀣由來  
一氣難季子功名餘短褐貢公心事在彈冠師門欲去重依戀時

向蓬山矯首看

獨游長椿寺

天街尋軟繡古寺訪長椿客興櫻桃夢詩情婪尾春看花思舊友  
躡屩笑同人衣素重如此還憐京洛塵

夜過趙北口感懷

車如雞棲馬如狗行人已過趙北口無多別意戀紅塵尚有離情  
繫綠柳風光着地到眼新月色依人隨處有此間景物似江南望  
裏河山列座右我來正逢杏花開我歸已在棟風後憶昔同袍二  
三子徐生繆生真佳友三千里外快聯鑣九十日中常聚首斯須

舊雨等晨星，惆悵蠅營復。狗苟賦獻長，楊術未工身。衣短褐，顏徒  
厚征衫，不製已十年。十年不製衣，見莊子。俗塵奚止撲，三斗未知明日又何  
處，不如且醉今宵酒。

### 發新店

纔辭新店月初上，計到荏平漏已沈。料得深閨今夜夢，旋書猶是  
望泥金。

### 由汶上縣城外行一路風日清美觀野人刈麥

汶水出原山，西南入濟水。停車望湯湯，薄言已至止。齊魯此分疆，  
秀色盈田里。麥隴黃如雲，農夫輟然喜。趁此日清和，腰鎌出城市。

西家碌碡敲東菑，臺笠聚既耕。亦已獲十斛，何濟濟纂纂。棗開花，  
紫纒紫結子，綠樹蒼成林。茅廬別開墅，幾日場圃閒。及時種秬秠，  
平疇惠風來。日暮微涼起，一笑荷鋤歸。歡迎有僮穉。

### 謁孟廟

戰國斯文喪，功留孟氏書。三遷慈母訓，百里聖人居。楊墨驅邪說，  
齊梁擁後車。神明扶正直，檜柏鬱扶疎。

### 曉渡黃河

不盡黃流勢，迢迢九曲痕。仙源天上落，地軸浪中翻。風色淮南樹，  
人煙濟北村。浮槎剛曉發，我欲問龍門。

晚泊高閔寺即景時重午前一日

揚州南去水清冷千里孤舟此暫停塔影鐘聲江北寺夕陽芳草  
御碑亭樹連鐵甕無邊綠嵐接金山不斷青明日渡江須擊楫水  
嬉鉦鼓動人聽

端午曉刻渡江風日流利瞬息間至京口

天風浪浪山蒼蒼舵師百丈牽餘皇岷陽到此幾千里鳥飛不盡  
江水長自古天塹限南北一望巨浸真無極我從瓜步出江口帆  
輕風利恣所適金山笑兀湧眼前空水照耀何澄鮮樓臺金碧輝  
指現紺宮琳宇相蟬聯焦山遠望正幽絕雲樹蒼茫不可識浮圖

絕頂見雙雕似與洪波爭搏擊豈知至信及魚豚午日全無雪浪  
噴蛟猶吳兒拋玉糝蛟龍遠徙不敢吞瞬息江面竟飛渡飽看峰  
巒知無數曉鐘猶傳北固樓旭日已掛南徐樹

呂城作

南指奔江廿里程搖搖鄉夢似懸旌陂塘五月無秋氣旭日和風  
過呂城

過鶯脰湖

晚色過鶯脰長川掛一帆順風吹去雁細雨溼征衫浪逐平臺淨  
山連夕照銜離家無百里鄉語辨謫謫

孔憲采 字雅六 號果庵 桐鄉人 廩貢生 候選訓導 著遇桂軒  
 光緒 桐鄉縣志 雅云 廣文性 格豪邁 有經濟 才中年 游歷  
 秦汴 甘涼 挾策 長征 不得志 歸就 冷官 咸豐 八年 署景甯  
 教諭 兼訓導 時因 鄰里 有警 奉檄 親詣 五都 督辦 鄉團 民  
 情以 固誘 植後 進多 所造 就講 求詩 古文 詞留 心掌 故於  
 故鄉 文獻 尤復 雅意 搜羅 歷權 麗水 慶元 台水 學篆 卒後  
 士林 交頌 不置

題鐵門店壁

出<sup>山</sup>不復入山 羣山互迴抱 終日山中行 山形未了了 莽莽只揚沙  
 荒荒疑無草 石子填滿坑 顛播車難保 塵沙面上堆 蟻虱禪中擾  
 腹飢腸自鳴 心煩口尤燥 薄暮投旅店 宛若歸家好 燂湯請一沐

麥飯圖半飽嗒然一覺眠雞鳴又上道

車道嶺感懷

驅車復驅車山徑羊腸盤望望車道嶺日落風漸寒攬轡自躊躇  
誰與結古歡眷言岷州牧知心良獨難

渡冰橋不果

脚踏黃河水魂飛白塔山山峭險而峻冰薄危乎艱往來車馬何  
閒關已溺猶將凋朱顏如何以身臨深淵父母髮膚同一斑不若  
仍上望河樓頭去崑崙星宿遙落杯酒間

過木寨嶺

獨漉復獨漉車曳泥中轂羣言上山難羨彼下山速上山之難如  
登天下山之速隨風煙豈知才上山即下山前車已覆由滿載欲  
速之咎誰相憐我有一言告我僕爾勿畏難勿求速駕輕就熟兩  
驂服前程可到會有時一任泥中之車獨漉復獨漉

六盤山

奇峰插空摩蒼穹飛鳧欲渡愁罡風僕馬痛瘡咸喘息我亦下車  
步窮劣一盤乍上較廣長直抵山腰躍飛黃再盤輪困漸狹窄俯  
視來路已嶄絕三盤四盤趾常顛巨石陂陀阻車前徑路迂迴益  
促急馬蹄滑達僕腰折五盤愈高風蕭蕭六盤直上二齊雲霄雲霄

仰見金銀闕上有仙人把手招我自南來飽遊歷濟勝有具攜蠟  
屐終南古雪滌塵懷仙掌明珠照眼來太行北上觀大野隴阪西  
行曾駐馬登山必欲躋其巔不若茲山尤盤旋一盤一盤繚而曲  
一盤一盤往而復山靈奇譎逞神功入我心胸膽氣雄下視人寰  
但塵霧跂行喙息何足數險巖一任秘艱虞我履如天盡坦途坦  
途在心不在境魑魅魍魎任奔競我姑下去勿逡巡莫作人間絕  
頂人

鐵門道中水石滿坑谷車輟屢覆詩以誌感  
碌碌碌石填谷滔滔汨汨水歸壑水石瑩琰相擊搏車輪曳之

常脫輟車脫輟馬折足前車纔過後車來行行覆轍互相續人言  
行路上天難我道天衢較平復泥漿三尺深陵谷千重複一步一  
迴旋疲驢珠敲我卧車中如蜩縮倒海翻江屢眩目憶賦西征  
只數年歸路還記來時熟昔日奮袂登今日鹽而伏昔日入險不  
知險今日坦途猶感感而况側徑懸崖彌隈隩奇險叠出當車軸  
我徒已痛我馬瘖我心冲冲多振觸求名畫餅虛求利鎗銖角翫  
辭形骸不世情羶腥滋味讓人逐何為備嘗艱險自去來歲暮道  
途猶漠漠伏頭思故鄉昂首縱遐矚但願天公假我一月晴崎嶇  
歷盡臻平陸歸家雖過臘八粥送窮猶可仿箕卜



勸孝戒淫歌 馬邑尊謀士題

賢侯仁政美且多大綱先在挽頰波頰波欲挽將奈何聽我勸孝  
戒淫歌人身七尺何<sup>堪</sup>幾父生母育恩不願啾啾襁褓關痒痲  
瞎庭幃尚婆婆無何歲月馳如梭少長便去戀嬌娥深閨但愛巧  
笑瑳高堂遂忘黃髮皤孝衰妻子言不訛吳姬楚豔况妖魔恣海  
愛河萬劫磨漏盡鐘鳴一刹那噬臍空自淚滂沱貽羞不復顧  
鮑請爾眼一搓三代荒亡罪同科請爾口一哦蔓草牆茨詩誰和  
回頭若海上山坡放下屠刀成彌陀松栢何須藉萬籬坭壘奚至  
悲夢我爾不見大椿盤鬱山之阿雞窠小兒蔭紛羅又不見金釵

葉葉映庭莎含飴弄孫頂屢摩不多愛日敢蹉跎毋學國風致譌  
訶勸爾承歡養志莫求他戒爾懷美人兮澤之荷化行俗美病將  
瘥定見廬生芝草田嘉禾嗚呼定見廬生芝草田嘉禾

石將軍歌

石將軍軍未起將軍之軍能殺賊為何高卧深山裏深山草木皆  
甲兵兼有岡阜作金城從來能戰貴能守將軍想以此成名大地  
干戈紛紛逼由粵東西江南北往來又竄浙江來望氣占雲頽如  
墨時清須資坐論才世亂還師武臣力武臣落落如晨星向張侯  
又騎箕翼將軍養晦深山中幾何年歲成老翁韜鈴久練皆神算

鞍馬能騎足效忠忠君報國將軍事將軍一起天下治我來挾策  
干將軍將軍行矣我執轡慎毋徒逞將軍威出山恐貽蒼生譏蒼  
生瘡痍將軍復蒼生家室將軍依不然坐老深山志氣日頹情生  
不取封侯死又不得馬草裹徒負磳磳丈六身造物生材意將左  
吁嗟乎旋頭夜夜起妖氛麟閣宏開待策勳指點天河誰挽取海  
隅還望石將軍

石馬歌

石將軍騎石馬石馬驅不去將軍戰於野漢武好馬天馬來穆滿  
馳馬瑤臺下燕王買駿骨五百金可捨伯樂相馬經北牡驪黃無

一可石馬石馬骨相奇天閑羣空房星墜牽之不動叱不前問爾  
馬欲何為者馬不能言對以意我馬稜稜世所寡腹飢不戀芻豆  
恩性劣不怕鞭絲惹立仗不鳴風不嘶冬無錦韉夏無房楊柳風  
梳鬣捲青桃花雨落汗流赭深山若遇九方皋昂首一鳴飛兩蹠  
石聽談經頭亦點馬豈無知心應寫誰教竚立此山中腰褭驂騮  
名不假會看天路去騰驤遭際風雲非苟且將軍得馬愈威神馬  
遇將軍非轍軻君不見鑄像久立金馬門馬兮馬兮應隨千駟躩  
蹠貢西夏

題魚口

雞犬幾人家征夫小駐車盤陀山徑側凹凸石田斜澗水淡塵想  
秋光媚野花此中饒幽趣回首已煙霞

偕陳希皋壩太守登首陽城

片石西山拜顏垣此又過派分孤竹國人誦採薇歌高饒古今少  
登臨感慨多黃虞應不遠清節盼喬柯

函谷關

險絕函關道羣峰簇劍鏗馬盤感山骨鷲起漏天光能把泥丸塞  
何勞虎豹當連橫誰獻策終古幾興亡

澗池懷古

能令秦鼓击宜止趙彈箏徒以優伶事空勞主客爭高才咸慕蘭  
要劫略如荆我過澗池道彌深思古情

山右解州為伯高祖贊原公舊治當日德政甚多茲見大廟  
中猶有長生位在焉敬賦五律一首

祖德百年久遺風尚灑然活民真父母驅虎賽神仙俎豆不祧業  
甘棠勿伐緣至今廉吏後長物只青瓊

題淮陰釣臺

功狗如何不就烹一竿應得早逃名蘆邊空賸高臺影跨下誰開  
大將營到底哀君漸漂母當初相背拒狂生長淮流恨知無極流

到桐江水自平

題漂母祠

那有魚兒上釣竿  
哀王孫困坐江干  
餉遺一飯恩猶易  
麾卻千金識便難  
野祭常澆豪士酒  
窮途誰設腐儒餐  
柳陰深處重回首  
漫與叢祠等量看

過芒碭

隆準公曾此隱身  
五雲深處竹皮巾  
大風莽莽揚空谷  
巨澤茫茫問舊津  
秦鹿終輸三尺劍  
楚猴徒抗八千人  
沛宮今亦多禾黍  
擊筑聲猶故國春

題歸德五忠祠

奕奕危城眾志扶  
睢陽遺烈古來無  
支撐半壁江淮固  
犒賞三軍妾馬俱  
崔鼠充糧湛碧血  
鬚眉奮戰懾雕弧  
五忠祠下重瞻拜  
好與疆臣作楷模

謁解州大廟  
即壽亭侯廟侯生長解州故廟絕大冠於海內稱大廟云

解梁地勢鬱輪囷  
嶽色河聲萬古新  
夫子道原生孔孟  
君侯生即是天人  
崇祠魏煥連飛棟  
古柏陰森稱降神  
報國功多留閱至  
今海內肅明裡

文昌書院雜詠

推窗却對二郎山雲起雲收指顧間  
兩舍書聲何詰屈一簾香氣  
任迴環障風庭樹花時落踏月階  
除草未刪底事鄉心忽撩亂子  
規啼徹雨濛濛

未漆闌干白板橋行來花影一肩挑  
風檐時見飄殘滴水磨邊聞  
激怒潮鷓睡梁間常故故馬嘶牆  
外自蕭蕭清閒却喜無多事要  
待浮雲看盡消

齋房蝸小比鱗檐啓閉重門鎖鑰  
嚴白石路分南北巷青油布幕  
短長帘執炊竈積虀三尺照讀窗  
窺鏡一奩猶有民羗舊風俗斯  
文何以下針砭

文昌閣外接魁星翼翼高臺敞廣  
庭菜圃抱城拆寒甲麥疇經雨  
課園丁苔衣潤處濃如畫書帶風  
前淡有馨載酒有人來問字此  
間應愧子雲亭

迴廊一帶別通門小院紅花舊瓦  
盆短短土牆肩可及疎疎香草  
指留痕紙窗板屋風偏冷細雨微  
雲月又昏遙憶故鄉櫻筍熟有  
人遲我倒芳樽

陰晴日日擾離懷高捲珠簾強自  
排近水樓臺雲裏迴遠山頭角  
雨中埋竹邊處處穿龍箨松下時  
時拾鳳釵不是張燈呼酒盞還  
來磨墨檢詩牌

示肄業諸生

長松兩樹講堂開，四壁光明絕點埃。  
鼓篋諸生成鵠立，舉匕老朽愧鴻裁。  
論文須得酸醎味，制行還防世俗猜。  
績學相期同努力，江源探得筆間來。

底事秦中又隴中，抗顏深恐誚冬烘。  
公卿倒屣虛前席，弟子擔簦拜下風。  
洗眼曾經雲水碧，談心相對蠟燈紅。  
百年科第應須振岷州幾二百年無待看，名場氣吐虹。

望河樓

瞰河傑閣洞窗疏，世界琉璃水雪如。  
隔岸山連西極遠，橫天雁到

北征初春泥印處，人牽騎黃溜通時。  
網出魚倚檻，高歌前出塞五

涼雲氣渺愁予

西甯一帶生番出沒無常

滯迹蘭州欲歸不得

輪蹄萬里歲三周，底事勞勞不自休。  
杜宇啼時剛醒夢，鷓鴣聲裏又回頭。  
無波井水人投轄，未泮河水客橫舟。  
誰唱江南春雨曲，一番惆悵一登樓。

題書齋壁

勞生爭得俗塵刪，却喜今朝靜閉關。  
瓦硯細磨閒寫字，軒窗高拓臥看山。  
隔牆樹影分新綠，著雨苔痕認舊斑。  
陡憶閨中小兒女，望

雲應唱大刀鏢

華陰廟

金天廟貌敬神州巨麗爭誇五鳳樓古柏蒼涼秦漢上殘碑摩搨  
褚顏流遠收萬派河源壯近對三峯華嶽秋我過下車重瞻拜藕  
花香裏記前遊

潼關

百二雄關此上游河山橫絕古今秋全秦鎖鑰重門固函谷泥丸  
一線收古塞桃林開放馬真人李下穩騎牛憑臨險阻誠天府還  
仗元戎策老謀

省墓東歸留別枯蒼同事暨麗慶景三邑門友八首

八載山城嗟冷宦三遷鄰邑為虛名自傷老大成孤注多感嚶鳴  
盡友生此去首邱尋一貉竭來心跡悟雙清履河楊柳依依綠惹  
起臨歧欲別情

一閱滄桑百事乖感恩知己半蒿萊孫吳遺法留空現李賀吟魂

屬鬼才

李庠卿太尊質菱香王審崖吳移華孫亮  
稼諸廣文均歸道山吳孫二君有文孫在

問字幸從安

宅校書頻上野王臺

胡柯亭崔松溪朱保甫諸君  
為余商訂著作保甫海鹽人

那堪哀樂衰年

甚慘絕雙枝玉樹摧

三六兩鬼皆有智慧善  
讀書上秋一月倍云

記曾戊戌到鴉峰耐冷齋廚斷宿春載贄盈門資鶴俸練兵要隘

靜狼烽奉飭督辦四鄉團論文亟拔清脩士葉生篤貞甫入學閱  
旋膺止訟還憐駿業農馬郡尊以景邑善訟羸得官聲一字好筭  
與到處喜相逢勸誠旋稍衰息媿然

小桃源裏舊移家避難景色小桃源鶴唳風聲總不諱時約鄰翁具

雞黍幾忘人世有燕沙游山記仿河東筆課子蘭開現北花今日

一編重展讀遺文猶在恨無涯余在山中輯小桃源紀

飲啄由來定自天石龍山下又三年主持公道忘恩怨慶元排糶

滋事余持公破絕私情視鏹錢盡存公所未及康韓脩舊志諸生

未果最憐羸博有新阡兩亡兒柩力不能瀕行饋贈爭相集提倡

尤稱令尹賢程亦陶大令鳩資贈行景

括蒼城裏好同官願我遲來局又殘晴舉陳連齋三大令均荷愛

卯投契先後京兆被侵才五日齟生向學仗三端義門獨行人稱

鄭達三明經廉博士羣嘲解讓韓多謝諸君推挽力麗邑紳士欲

無心雲岫往來安

歷數心期列竹溪萍蹤小住又分攜初時寅好祇陶百生劉友仙

六人余既告歸百寒壇幾見春風暖綰帶重尋葛雨淒駕棧那堪

生亦將教授嘉興羸馬困登樓惟聽子規啼杏花一唱江南曲不為河陽險徑迷

最是交情別更深也知教思老難任姑脩金石千秋錄余近著金

石錄紀生



遊交聊寄冰壺一片心  
泮水鴉音何處化近亦有為余屏斥者故鄉  
鷗侶久相尋  
渭城三疊人爭和  
愧我難酬白雪吟

竹西路

模糊雲樹辨樓臺  
鼓吹聲中五馬來  
記得承平饒遊宴  
樊川好句又誰裁

鯨波湧入大江東  
萬个琅玕類斷蓬  
試看茶毗餘塔院  
碧甌多帶夕陽紅

歸德道中

寒衣攬轡怯微寒  
此去秦關路百盤  
漫笑風塵題柱客  
雪泥鴻爪

記重看

江南行徧又河南  
濁酒澆來旅夢酣  
遙憶故鄉風景好  
紅蠶箔上已眠三

奉和楊簡侯觀察能枯襄校武闡原韻

橫掃千人仗管城  
封侯骨相早馳名  
朝來試向長橋望  
萬騎雲屯獵獵聲

羽林此日徵材傑  
麗藻當年賦帝京  
難得諸公高着想  
桓桓羅虎一軍成

嚴陵道中

百里桐江穩放舫畫眉聲裏遠山青夜來記向高臺望細雨微茫  
掩客星

七里瀧過到富春翠屏幾曲隱高人滄沓豆飯蕪羹粥忘抵竿頭  
細口鱗

閩榜人

一篙一櫂一帆輕一个舟人一葉撐下水順流上水逆爭教苦樂  
不分明

張士彬

字君貽號硯史桐鄉恩貢生候選教諭有林居士稿已  
燬光緒桐鄉縣志公幼承庭訓篤志好學詩文雅有法  
度生平持躬儉約秉性端方為鄉里所推重成豐庚申八  
月粵寇至鎮入其家公毅然不避責以君民大義職不知  
所謂舉予貫其胸立死卹贈雲騎尉世職

七夕

夜色涼如水明河靜不波已從牛渚渡又上鵲橋過佳會今宵永  
離懷別後多娟娟新月好聚散奈愁何

曉出

曉出西村去行吟過石橋春深垂柳暗風急野花飄獨鳥迷煙細

孤帆出樹遙悠然臨水立隔岸酒旗招

山窗漫興

老樹積成陰奇雲聳碧岑煙霞有深契泉石足清心愛友常儲酒  
消閒每撫琴溪聲頻漱耳儘可滌煩襟

和吳雪坡七夕

露冷風清夜未闌誰家粉席鬪金盤明朝乞得天孫巧好向人間

繡合歡

畫屏銀燭付良宵此夕雙星破寂寥若使盈盈終間隔云勞靈鵲

夜填橋

張元吉

字蓉鏡桐鄉人諸生著有湖海詩歌

孔憲采雙溪詩匯蓉鏡家貧授徒自給酷嗜詩與吳香圃  
徐鶴舟相倡和鍊格造句絕似唐人兩遭回家祿其煨燼  
所藏前人及諸交游詩文稿殆盡晚境益困幾得徑無所  
容其身丁巳手錄詩一冊界子因甄錄之讀者想見其樵  
斧專一之況宗咸熙耐冷譚蓉鏡居邑之青墩有詩名  
越王臺云落日山無際大江風北來茫然千古意獨上越  
王臺烏喙今安在鷓夷去不回霸圖成底事刺有鷓鴣哀  
他句如春遊湖上云斜陽白塔尋詩路細雨青帘賣酒家  
苕溪舟中云白蘋秋水數聲鶻黃葉夕陽何處山題谷音  
集云采薇不少遺民唱浮海難招故主魂蘋花云夜雨吳  
江行客權秋風湘清美人心俱極秀整

雪溪北溪僧舍

雲凍鐘不流餘音停前灣松門一犬吠雪舫孤僧還我時披鶴氅  
來坐梅花間敲冰夜著煮茗冷然如深山相對了無語佛虛堂閒

村莊

幾家籬舍小林際有村莊野水白前渡杏花紅半牆門間喧鳥雀  
日落聚牛羊父老向余道東皋農月忙

夜霽

雨餘檐尚滴夜色柴門幽月出照潭水澹然如已秋時聞村巷犬  
不見溪上舟伊人渺何處獨立興悠悠

雪雪山圖歌為沈孝子

孝子名蒼樹桐鄉人其父諸生

乾隆間因事株連遠戍

孝子萬里隨行後父卒戍所奉柩歸葬作雪山圖以誌哀

吾聞雪山之雪萬古長不消峰峰晶瑩撐雲霄窮邊絕徼少人到  
雪花如掌終年飄沈子當時痛親戍荷戈侍親山下住天寒凍卧  
雪窖中嚙雪思效鳥返哺五更雪後望家山糝糊不辨冰沙路惟  
餘一片雪山月飛照故鄉梧桐樹刀鏗歲歲卜無日淚灑哀笳風  
木急此時縱道玉門開腸斷空招魂魄入日落長城馬不前但見  
荒：大漠浮蒼烟雄虺兼猛虎磨牙草間眠崇關連峻嶺橫亘飛

烏邊孤兒扶棺越萬里瀕死仰荷皇天憐歸來負土相溪側墓封  
三尺短碑植杜鵑聲裏祭寒食麻衣猶帶雪山色回首雪山何處  
是雪泥痕向畫中指蕭蕭白髮今老矣誰為買絲繡孝子嗚呼誰  
為買絲繡孝子

懷懷徐鶴舟石麟

但覺雪明樹不知月滿湖乾坤浩然白人在一冰壺極浦艣聲斷  
寒皋鶴影孤梅花村畔放高卧憶林逋

古意

匹馬鳴蕭蕭酒闌分手去河梁風雪深不見君行處

贈宗硯史士彬之江右

東風吹上大江潮橫笛天涯怨柳條彭蠡春深歸雁斷潯陽日落  
去帆遙高堂有夢顏應瘦下榻無人淚易飄君向鬱孤臺上聽萬  
山夜雨正瀟瀟

代吳香圃酬俞生香儼武林寄懷作

望斷江流入杳冥相思遙夜在吳舫露從哀雁聲中白山繞離人  
裡青蓬鬢不堪成老大布衣空復感飄零憑君莫問秋風曲長笛  
樓頭忍倚聽

讀宋史五首

倉卒在陳橋黃袍從何得還軍受周禪直向孤寡逼豈知伯顏來  
降表有瀛國

假山是血山聞諫尚毀折築塔貯舍利八年民力竭金碧雖輝煌  
忍見塗膏血

謂天本無書河圖昔已有謂天竟有書後世出人手封禪徒紛紛  
彗星見北斗

將相日侍講經筵明治道治道首農功苑中刈麥早區區草木瑞  
聖主幾曾寶

花石運未已良嶽起城中哀鳴多鳥獸夜靜村墟同問誰實為此

闕闕寺位三公

前題  
五首

太祖昔已誤陛下豈再誤金匱負遺盟職由普<sup>言</sup>廷故六尺竟誰託  
空談魯論句

澶淵禦強敵寇相才堪使當日若長馳驅可雪中原恥惜哉遽許  
盟歲幣從此始

弭亂無異法在化賊為民郡守與州牧朝廷須得人不見張益<sup>州</sup>妙  
遺像蜀中存

李氏據靈臺自為西夏主得地勢寔驕稱臣亦偽耳綏州慎勿棄

魏公議良是

小朝南渡日中興由一旅天下豈難平當思武穆語文臣不愛錢  
武臣不惜死

妙高基臺

不盡風雲湧無邊淮海來渡江誰擊楫醜酒一登臺宋室偏安日  
蘄王大將才中流八千騎血戰有餘哀

廬山瀑布

匹練三千丈遙疑飛玉龍半空挾風雨挂在青芙蓉絕壑噴流下  
蒼茫雲樹重題詩招太白直上最高峰

匡門懷古

莽莽羣星墮遠流黃龍出海倍堪愁孤兒空作無家哭上將終勞  
報國謀楚誓向風濤挾扶九鼎難迴天地入孤舟沈沙折戟悲何限  
屈指滄桑五百秋

金陵懷古

王氣東南半壁收當年幕燕不知愁六朝花月同傾國四鎮烽  
烟自列侯鐵鎖幾聞天塹險銅鈞駝空泣孝陵秋孤臣魂魄長江  
裏應共濤聲撼石頭揚州刺史自投江死

太白樓

謫仙去後此樓空猶說當時睥睨雄不盡江流挂旌外忽來岱色  
落杯中風塵知己汾陽重宇宙論文杜老同魂魄千年何處望暮  
雲暮無際大江東

杜文貞公入蜀像

老病愁看向蜀門長安遠隔暮雲昏三巴落日滄江路萬里扁舟  
獨客魂家國居然詩史在乾坤終古草堂尊亂離至竟歸何處腸  
斷衡陽哭嶺後公自蜀入楚因兵阻卒於耒陽舟中

寶祐四年登科錄歌

宋理宗寶祐四年廷試一甲第一文信國天祥二甲第二

謝侍御榜得其二十七陸丞相秀夫是科得人最盛云

白雁陣高南來速黑龍頭出北走哭諸陵玉匣猶難守六百年來  
復何有有客空談寶祐朝一編傳自滄桑後淡墨曾標金榜名其  
間幾人能不朽厓山劫火燒朦朧陸相哀號血淚紅奮然蹈海身  
負帝趙家塊肉波濤中是王勤時王兵誰起信州鼓潮陽鼓聲慷慨  
累臣漢節提淒涼遺老周粟恥文謝終推就義同三仁至今垂宋  
史嗟乎男兒識讀書識字忠孝足餘子當日殊碌碌千秋之名豈  
在登科錄

贈徐春叟堅之湖南



楚酒莫辭醉春寒侵客衫  
笛聲漢陽柳雨色洞庭帆  
魑魅隱荒驛鷓鴣啼翠巖  
知君珍重處鄉信幾回緘

見山閣夜寄懷吳香圃全昌

遠山淡欲無林外秋鐘冷  
簾捲霜一樓烏啼月萬井  
卧聞黃葉井吟對青燈影  
遲君抱琴來冰絃寫幽靜

吳江舟中懷宗鐵甫海珊

鱸鄉吟思入秋激欲訪吳中  
一季鷹疏雨孤篷來笠澤  
寒塘落葉下松陵文章敢  
作經時計山水真如耐久  
朋安得五湖最深處浮  
家長共對魚鱗

經拂水山莊

風流江左信超羣拂山<sub>水巖</sub>前  
一憶君東漢黨人悲孟博  
南朝宮女識休文香<sub>空</sub>山花落  
餘紅豆浩劫書焚兆絳雲  
堪歎尚書當日事蘆蕪  
何處夕陽墳

夜過練塘

風急水冥冥江樓遠火青  
洞簫吹夜半驚起老聽<sub>龍</sub>孤  
擢寒搖月空潭凍霏星  
相逢鄰舫問何處落帆亭

瘞燕

嚴溪客舍早起見一老燕  
死於地余為惻然命僮瘞  
之時

乙未七月之二日

新秋憐曉寒香館獨延伫空忽訝中庭前何來孤燕死細推光可擬疑

為爾感難止念昔巢成時思勤育數子一朝毛羽長離別從此始

詎不暫歸來衰病誰日視返哺那能待而今長已矣嗟余方失親

他鄉忍見此昨夜白楊樓蕭蕭風雨起慈烏思取林啼斷五更裏

凝生飄均同形化轉哀汝呼僕持鋤隨荒園更相指深埋擇淨土

母使投羣蟻非謂汝有知我心庶安耳

臘月十四先君諱日余在嚴聞兩弟皆未歸感作

此日成三處他鄉望九原死生同別恨負賤負親恩苕水舟難得

麻衣淚尚存歲闌家祭夕誰拜白頭魂

思家

思家當歲暮而我轉愁容歸客久顏增瘦囊香淚空揮老親遲馬鬣病

婦泣感牛衣况復多風雪催租吏叩扉

柳烈女詞

烈女鶯湖人許字語溪題趙氏子其母因趙日盲返聘改字

女遂吞喬金死有遺圖歸趙適趙日復明編徵題詩余哀其

志為紀其事以待采風者之表揚焉

劍剛甘遭折珠碎不復圖吐哉彼柳女其志何獨堅當年媒妁定

許字平康子忽傳趙目盲變起由母氏女曰父命重兩全誓一死  
是時夜昏黑鷄啼聲惻惻迴腸自寸裂一燈鬼思在室容容顏儼如生  
白璧同完貞遺像竟歸趙此身終分明趙子持圖位恍惚感精靈  
雙眸得重見斯事人盡驚問誰為作歌勒石青山墓千秋行客悲  
共指女貞樹

### 臂血歌

明孝廉唐元竑生有至性母病剗左臂肉以進及母歿刺  
血書華嚴經居琪園不出父世濟以舉薦荐蒙遣禍不測孝  
廉兼程抵朝報血疏陳情思陵憫之卒從輕議甲申聞變遂

### 入古山為僧

嗚呼孝子臂上一片肉持求療母向天祝孝子臂間血萬行疏求  
代父陳君王古來孝子豈有此獨有琪園一人耳琪園至性奮激  
真不愧前朝孝廉士想當生遭多難年事雖先後同慘然救親但  
覺臂奚恤處變難云身自全抽刀入臂臂肉裂臂血無聲奔流出  
從此血枯類廢疾痛定思痛常惻惻古山沈沈多雨風杜鵑啼血  
山樓空縹衣祖祖臂獨夜卧琉琉燈照刀瘢紅祇今誰吊吊荒園碣貝葉  
善嚴並湮滅聞道寫經曾為親亦是孝子當日臂上血

### 分水墩

亭閣浮空如畫圖登臨合喚小蓬臺檐前一角分三郡樹裏雙溪  
入五湖星斗夜懸龍背濶朝乾坤秋老雁聲孤酒酣獨倚危欄望鉄  
笛高吹和有無

唐子紀事

誰遣據艨艟據上游鬪牛山外陣雲愁島夷已窺吳郡漢使依然駐  
越州滄海風煙何日靜中原財賦賦幾人籌布衣未敢書輕上獨倚  
城南百尺樓

卞烈婦詞

婦盧姓余族甥女也年二十適卞氏子越六載夫死自經

死距夫死十二日時適道光丙午二月之六日

蘭蕙抱香悴松柏多動勁姿同懷貞潔意道在各隨時麻衣歸地下  
巾幘良足悲鴛鴦不獨棲連理本同枝枝枯心自堅兔絲安能知  
婦人從一耳夫死將依誰上無白頭姑下無黃口兒妾命固終窮  
雖生亦奚為慷慨設祭畢牀前未繩垂郎手昌少待相見會有期

沈侯哀滄州殉難事

咸豐癸丑秋九月流寇陷滄州知州沈如潮死之公藉  
桐鄉嘉慶庚午科舉人號月海

銅馬來官兵走中原之地半失守何況滄州城如斗公獨率眾誓

登陣鞞中置刀印擊肘顧謂家人城陷後爾曹毋使遭賊手  
燧火  
轟天鬚眉燃兩兒泣隨公左右公揮長者汝速行我身當報國  
恩厚拔刀殺賊聲怒吼力窮卷戰血汚首賊憾公深遂肆屠賊去  
城空斷雞狗孤兒號呼歸歛公  
詔賜專祠垂不朽大書滄洲洲  
牧某一家死難十三口歲癸丑月在九

哀姚小蘇學蘇

男兒身不能報國讀書萬卷亦何益吾友小蘇海內傳滄州禦敵  
洵奇特滄州城頭燬火紅滄州城外羣鷲弓君時適在圍城中州  
牧况為君婦翁遂留惟慳得參畫韜略彷彿師黃公吁嗟城亡猶

力戰死難甘與州牧同回憶當君北上日江干楊柳曾惜別棘闌  
既捷纔歸來驅車仍向昭王臺薊門八月霜飛早羣山木落雲際  
開興來君效長鯨飲直把滄溟作酒杯酒酣夜燒官舍燭婦翁相  
對如冰玉慷慨抱負天下事拔劍高歌燕趙曲長安自昔不易居  
去年寄我雙鯉魚春風杏花偶失意盧溝匹馬行躊躇五斗俯就  
西州邑乾坤帶甲愁何如青天未看城眉雪碧燐已照沙場月可  
憐閨閣夢君歸無定河邊餘白骨嗚呼君家婦翁足千秋崇祠今  
已留滄州君為鬼雄合從祀荒城夜雨聲啾啾故鄉望斷三千里  
杜宇留上清風樓樓在滄州

悼故友

吳君香圃歿已二十餘年矣厝棺南浦風雨飄搖余託其門人邱雨樵廷銓為營窆窆更求助於余友陳秋泉得成其事墓舊在倩涇之溪南因遷其柩用白雲葬法并厥配錢氏周氏祔焉

我行至原野白楊風倒吹林際老鷓鴣嘯草間鶯獸馳長歎為故人  
一棺當路陸急呼將伯助首邱得有期休云死者慰友義吾終庸  
再拜向墓前抱恨告君知相如有遺草歷劫何數奇臨終念重託  
負君罪安辭憶昔訪君初雪夜同談詩陋軒霽月上梅花香滿枝

嗟我今獨存頭顱已如斯身世兼多難憂懷無釋時餘生尚幾日  
復自收涕洟勸君安地下萬事類弈棋君兒孤且鰥後來更望誰  
明年寒食節應澆酒一卮

寄題燕南孔侯祠

公諱慶珪山東曲阜人仕交河令咸豐癸丑歲死寇難一  
家四十餘口同遇害

中原誓遏寇兵過力盡危城尚執戈千古英雄同涕淚一家忠孝  
壯山河雲橫岱嶽歸魂遠日落滄溟戰血多剩有崇祠燕地在遺  
民祭酒自悲歌

聞業定山守府死難蕪湖作歌哀之

君諱邦勳浙江麗水人由行伍從征舟山以功授湖協千  
總駐烏鎮凡七年擢象山守備未赴任適任甯國告警大  
吏檄君戍廣德遂由宣城進兵蕪湖咸豐甲寅秋九月二  
十五日抵東梁山遇伏戰歿其仲兄某往奉屍歸殯於苕  
東邨寺君身被鎗三斲珠洞胸際而生氣猶凜凜羣相歎  
異初金陵不守全浙戒嚴君語余曰時事至此我輩當以  
死報國公等毋自懦卒踐<sub>言</sub>以殉嗚呼烈已

昨夜夢君形恍惚沙場鐵騎馳黑月朝來<sub>苦</sub>上驛書傳忽報蕪湖

已戰歿憶君去歲與我別奉使治裝月初吉望仙橋畔柳條新春  
風吹作可憐色陽關三疊為君歌一聲入破笛驚裂君時酒酣指  
佩刀却話舟山從征日英雄獨數葛將軍七尺昂藏終報國我聞  
斯語彌歎息君向宣城原努力自從狼虎來南中銅鼓淒涼故壘  
空桂林烽火長沙接鄂渚戰船潯陽通小孤采石忘設守金陵鐵  
甕城陷同殷浩談兵虛望重士衡為帥材尤庸祖生孤憤渡江誓  
亞夫堅營當敵衝君若居偏裨位雖下丈夫貴自立奇功是日揚  
鞭遂西去<sub>塵</sub>飛不見君行處鳩江九月霜沈烟太白參旗殺氣連  
聞君部卒不滿千乘勝徑趨東梁山梁山峰迴高極天伏兵哭起

鬱莽間君持短戈奮呼前  
礮礮珠洞胸流血殷傷心  
馬草裹屍還直似將軍海  
上年嗚呼君之大節在青  
史武臣安得盡如此乃知  
南八真男兒我輩牖下空  
老死

自題詩稿

心血幾嘔盡旁人竊笑之  
坐居一室內吟苦頻攢眉  
乾坤混沌鑿萬象來赴馳  
精華萃方寸百鍊矜神奇  
綺語斥羣艷正宗明吾師  
恨無斗石才終少江河詞  
詎意造物忌文章恒數奇  
六丁忽追取烈焰無留遺  
我思著作事聊慰窮愁時  
一卷重默喻憶珍藏毋乃  
癡生前尚難恃身後安得  
知或供蠹魚腹或作覆瓿  
資茫茫傳世心古今同涕  
洩縱使千秋重浮名亦何  
為撫此長歎息空自賞音  
期兒頑况廢學誰誦老夫  
詩

避亂江村作

亂離何處得容身  
夜半聞雞起舞頻  
四海瘡痍今日事  
一燈歌哭暫時人  
昆明莫問沈灰在  
天寶空傳法曲真  
誰念江村風雨際  
滿頭白髮有遺民

贈燕

新巢難定為君嗟  
忍見江南正落花  
莫問舊時王謝宅  
尋常百姓已無家



寄贈陸定圃 以恬

虎口驚魂在，聞君喚奈何。  
還家生計少，避亂客愁多。  
戎馬當關路，樓船截海波。  
滄川雖境險，對酒且高歌。

過黃浦作

浩浩天風外，江流戰國聲。  
怒濤來遠海，落日隱孤城。  
身老文章廢，時危涕淚橫。  
壯心殊未已，直欲請長纓。

聞鵲

畢竟何時始得歸，故鄉亂後望尤迷。  
天涯同是無家客，忍向斜陽聽汝啼。

胡桐封

字新田歸安諸生著樸陰樓詩草

送春

銜觴自酌餞殘春，永晝遲遲未了因。  
隔院落花紅滿地，環溪芳草綠成茵。  
誰教粉蝶催蘭夢，莫倩東風醉玉人。  
惆悵良辰留不住，桃源何事問前津。

春盡江南寄夕暉，芳郊徙倚送春歸。  
香閨夢斷渾無主，旅館杯傾半掩扉。  
何事風光偏寂寂，徒教楊柳自依依。  
他時移步園亭裏，一曲南薰護綠薇。

冬夜有感

玉漏催連度幽人思渺然燈花堪卜夜梅影又經年文史漸冬足  
功名感歲遷來朝聊自遣索笑向檐前

詠蓮三首

紅蓮

芙蓉花放一番新薄試輕紅更可人曉露半含珠欲動晚霞斜映  
粉初勻芳池暑淨浮蘭棹曲院陰疎漾錦鱗楚客有心江上采為  
裳豔奪繡工神

白蓮

褪盡嫣紅不逐時白描丰致最相思冰魂已斷春三夢玉質輕翻  
月一池露冷閒階消粉汗風來小院立瓊姿須知本色天然好淡  
掃蛾眉也合宜

並蒂蓮

連理無枝亦並頭亭亭小立倚清流妝成波鏡休相妬夢到江干  
合共遊水閣風搖雙鬢亂花房不結兩心伴鴛鴦美爾同棲好對  
舞斜陽故淹留

詠新蟬

入夏林繁密良蜩應候鳴枝頭音乍試客邸夢初驚神與琴心會

送隨笛韻清莫言新振羽從此發長聲

春夜讀書

獨展芸編讀燈花結蕊新莫言春意懶萬物發三春

胡汝金

原名載勳字襄臣號柘村湖州府學諸生  
柘村茂才工詩善飲雄於文屢薦不售抑鬱以及著對廢  
山館學吟草

梅

何來玉樹種人間開遍林巖又水灣影亦有姿逾淡遠香原無跡  
最蕭閒美人夢醒月如水仙客吟來雪滿山欲折一枝何處寄夜  
深許與鶴同還

漁

曉起放柔櫓暮歸泊花鵝老翁慣醉眠破網呼兒補

舟中晚望

向晚水窗望長吟興不窮寒塘秋草綠廢塔夕陽紅犬吠荒村外  
僧歸遠寺中蒼茫增暮色煙月滿疎蓬

春游

幽尋路繞夕陽斜一帶垂楊傍水涯指點隔溪村落近桃花紅處  
是誰家

漫興

年少功名不可求眼前風景且勾留壺觴有約曾留客蒲柳無情  
自望秋曉枕吟詩綠夢得夜窗聽雨替花愁聞來欲把山經讀却

祇宗君五嶽游

贈吳玉舟

落拓誰相顧風塵喚奈何由來千古恨名士白頭多

慰牡丹不開

聞說天香迥絕倫如何寂寂度芳辰林園乍到根猶淺雨露初經  
節未伸自是名葩難得氣不同小草易為春他年合譜清平曲付  
與長生殿裏人

紙鳶

高張健翮勢難留借得長風志可酬頃刻騰身霄漢上笑他人世

畫臺頭

菖溪舟夜

携扇坐蓬窗夜涼思起忽遠山盡白雲缺處見新月小閣一螢飛  
疎柳亂蟬歇相對且高歌微風起林樾

自題小園

孤懷聊自平吾真敢道神仙並出塵風月滿林山作主煙霞一塢  
竹為鄰能消清福何妨老但得名花不計貧領取小園春色好琴  
樽幾度約詩人

訪梅

一種春消息東風不可尋雲中逢老鶴引我上高岑忽憶羅浮夢  
月明何處林歸來小窗畔獨坐理幽琴

示邱默齋

廿年落魄名未成富貴浮雲於我輕花發當春香酒國月明終夜  
擁書城開樽且作北海想下榻聊挹西山爽與君長嘯坐樓頭莽  
莽乾坤多慨慷

春夜獨坐

春夜挑燈坐幽窗寂不喧月移花入室風遣竹敲門破俗尋書本  
澆愁倩酒樽眼前鏡景色可更與誰論

團扇歌

合歡扇何玲瓏班家舊樣能招風伴永夜消永晝碧紗幮中涼意  
透不數七華妃子賜何須六角右軍字我今預訂隔年期莫怨秋  
風長別離

胡書勳

客中

蕭蕭風雨滿行程客館淒涼別恨生夢裏分明歸故里那堪枕畔  
曉鐘聲

秋海棠

淡妝小樣十分幽點綴寒窗又素秋一抹醉顏深入骨半生睡態  
倦低頭風前細影飄難定雨後輕枝翠欲流最是魂消腸斷處背  
人無語只含羞

字簡香歸安諸生著亦怡軒學吟草

夜雨

一聽秋宵雨愁人枕便支恰因檐溜急翻訝漏聲<sup>遲</sup>屋燈昏候蕉  
窗夢醒時披衣頻起坐入耳動相思

新燕

東風吹送景嬾妍花信江南又一年下上忽看飛巷口呢喃剛聽  
語檐前綠楊樓閣迷殘雨紅杏村橋帶晚煙乍見故人如欲訴水  
晶簾外話纏綿

漁樵耕讀四絕句

春雨漲春波春江舉網過醉來卧明月身壓柳陰多

出入白雲岑往還紅葉林夕陽一肩壓時聽暮猿吟  
細雨荷鋤去百花香野風田歌何處起歸踏晚晴中  
一燈寒老屋風雨敲窗竹恥效冷蛩吟陰符深夜讀

登峴山

勝景年年話峴山款斜石徑幾回攀綠陰微露亭雙角碧浪斜侵  
水一灣峰影低隨人影立屐痕踏破蘚痕斑堂前逸老今安在羨  
煞天邊月自閒

者番約伴快登臨山勢巉巖樹影森萬籟軒前曾把酒百花洲畔  
又聯吟日斜樵路停春騎月上煙林息暮禽到此令人舒望眼蒼

茫磴道白雲深

碧浪湖樓歌

浮玉山前碧浪深東風料峭嫩寒侵開窗便是菱花鏡照出愁人一片心

異卉奇花處處栽分明一幅畫圖開乍從楊柳隄邊過又向芙蓉塔上來

漁父詞

漁舟一葉漁磯曲綠蓑映水水亦綠滿頭霜雪是何人狀出漁翁清拔俗有時撒網水之涯紫鱗躍起碧浪斜穿入柳條携入市換

與前村賣酒家歸來一棹移船去向晚忽到溪深處溪深柳曲樹陰多醉卧明月不知曙

團扇詩

明月何皎皎團扇何翩翩翻熱氣噴雖懸珠同是樣團圓人言月有虧不如扇無偏月圓無幾時扇圓長獨全豈知秋風起團扇中道捐仰視天邊月清輝自年年寄語承恩人得失頗昭然耐冷身獨潔趨炎情易遷

乳燕

棟風梅雨候更新玳瑁梁間學語頻楊柳一隄花一簇春深池館



寂無人  
弱羽翩翩試夕暉呢喃仍自入羅幃祇緣傍母情猶切未忍離巢  
便遠飛

春日野泊

一櫂停何處垂楊覆綠陰僧房臨水靜鳥語隔花深小立多幽趣  
閒愁結寸心蓬窗歸路晚斜日墮煙林

立冬前一日口占

靜坐書齋漏欲終年華如水去匆匆燈前莫道今宵冷轉瞬西風  
又北風

陸秉樞

字長吉號綸齋又號眉生桐鄉人道光丁未進士翰林院  
編脩戶科掌印給事中著有眉生遺稿

光緒桐鄉縣志公生十歲而孤秉承祖訓有神童之目十  
三歲游庠見賞於學使江右陳公用光為作蹇修聘同鄉  
汪提軍道誠之故里人至今豔稱之道光癸卯舉於鄉丁  
未成進士入詞垣咸豐壬子大考前列記名遇缺題奏旋  
授山東道御史調貴州江南兩道升工科給事中調禮科  
掌戶科印視中西兩城任臺諫數年屢上封章皆能見其  
大其尤著者諫設京師夷館諫阻巡幸木蘭諫止內務  
府召民間優伶演戲有五不可之疏事雖皆不行而公之  
直聲震天下夷酋聞之皆為歎服同治初元公奉母諱有

詔起復赴豫營襄贊軍務勉以移孝作忠方欲大用而公遽卒於

軍

優詔褒卹贈光祿寺卿銜蔭一子入監讀書蓋異數也詩文皆極

精謂尤工倚聲書法得唐賢三昧得者寶之

願作偉魁史雜記陸眉生侍御在都中間天甯寺活佛降  
往觀之立命隸持鞭笞活佛隸曰他可答此不可答也侍  
御曰不答當笞汝隸不得已答之則草人而傳以泥者也  
觀者立散捕寺僧治其奸

### 望岱

元氣千峰合丹梯一線收雲封秦代樹泉語漢時秋霖雨關天下  
屏藩冠列侯平生湖海氣到此總低頭

不怕山靈笑塵心未可捐高蹤讓猿鶴過眼等雲煙挹袖誰仙骨  
支筇託後緣吟魂夜飛去練影夢吳天

### 吸筭

長鯨吸滄海一吸三百杯局促池沼間心目不得開涼風吹荷葉  
淨掃筵前埃對酒不欲飲奈此鷓鴣催當花四躊躇拍手紛歡咍  
謂此千柄荷可以供尊罍扣同壺盧顛吹此葭琯灰凭闌試呼吸  
清氣橫胸來乃知天地間無物非通材用之苟得所草木皆新裁  
書生好議論此理然乎哉不如化遊魚葉底常徘徊不然作鷗鷺  
飲啄無相猜魚鳥不足羨玉山還自頽擲杯向太華便作糟邱臺

代內留別諸姊妹

不將彩筆畫雙蛾  
別有幽懷寄綺羅  
詩倘可圖真是錦  
經如肯寫願為鵝  
三吳煙水牽愁易  
百粵山川得氣多  
欲把金釵依絳綬  
寸心無奈別離何

纔得相逢又別離  
可憐身世竟如棋  
慚無國手來收拾  
幸有天心妙主持  
所喜畫眉皆快婿  
但看衣錦即歸期  
臨歧各有千行淚  
應為新詩一解頤

馬頭孃神絃曲

春風吹暖陌頭樹  
蠶市千人萬人聚  
相逢都道迎神來  
敲破村中

賽神鼓誰家女兒嬌  
可憐祈蠶奢願如奢年  
銀瓶但願挂桑上  
恰

好上巳逢晴天燈前幾  
費油花卜潑徧年年上元粥  
雲車風馬神

降靈絮語頻頻向空祝  
妾身不願著綺羅  
妾眉不願描長蛾  
登臺

豈怯使君面携筐且唱羅  
敷歌終身願作採桑婦  
可憐此意神知

百今年賜妾十分蠶  
異日酬神一樽酒  
神前一語一下拜  
祝罷殷

勤尚低首迎神送神日  
欲斜相邀女伴同還家  
眠頭捉罷復暗祝

神祝定副儂願奢曲房  
籠火再添葉但聞食葉聲  
沙沙睡醒笑語

忽喧闐吉兆無殊牧人夢  
和風暖日閃靈旗  
擲下雲端繭如甕

辛丑歲映夷犯浙挈眷避江右外舅處留別諸同好

綠酒紅燈興未闌前塵回首便漫漫天風有約孤帆疾江水無波  
六月寒此去情懷多落寞明年詩卷互傳觀謫仙倘肯分餘慧擬  
向西山訪彩鸞

酒冷燈寒鎮寂寥吳娘偏唱雨瀟瀟帆樁去住都陳迹書劍飄零  
又此宵隱語未妨絨綠蠟閒情無奈託黃嬌離愁別夢酸辛極只  
有吟魂不易銷

蒲帆一挂氣如虹漫道因人計未工重耳業從齊贅起子安才到  
豫章雄無人具眼驪黃外我輩成名困阨中賦罷解嘲還自笑書  
生舌在不為窮

癸卯仲冬計偕入都小住吳門燈下作家書畢偶成三絕句

題團扇寄內

孤舟風雪自衝寒聽偏荒雞翠被單不是郎心愛離別長安花要  
少年看

夢醒還記出門時露冷星稀送別離抵得銀河秋一度牽牛花放  
是歸期

扇光如月月如盤白舫紅闌各自看手寫齊紉親寄與與卿長似  
月團樂

家寄書二首

親在不遠遊此義垂古今有方乃變例已非人子忱如何旅人蹤  
轉徙如驚禽作書告慈母欲淚那可禁去年別母後一枝分桂林  
母喜與我書勸我意何深曰汝大父母教汝夙有箴汝父早棄汝  
堂構期汝任循吏必有後天道良可謀寄汝以遠志勿負頭角森  
倚閭不望汝但望馳泥金臨風讀母書長跪淚泫泫誰知鴛鴦質  
一唱旋復瘖不看長安花翻為梁父吟瑯琊一千里山高可捫參  
兒昨夢見母似有白髮侵微名不早就歲月愁駸駸行無定所  
母夢恐難尋平安數行字聊代兒語音兒今頗健飯不復資苓復  
長途兒亦慣母勿憂崎崙豫章寄書郵舊例多浮沈縱使無浮沈

還恐傷母心

娟娟一輪月照此方空紗羈人胡不眠生聽街鼓過作書寄我婦  
握管心如麻相思那可道欲語無津涯所期慰我母常使餐飯加  
呢呢兩雛鳳應解念阿耶我欲授一經常苦道路賒讀書貴性情  
風雅乃萌芽作聖在蒙養所重思無邪紅燈伴清課持此報秦嘉  
我生志四方跋涉何足嗟山川助文字此語當非夸祁公素愛我  
謂我馬中驎騰驤今有期勿復愁鹽車夢魂倘覓我大道通瑯琊  
書成復長歎仰視冰輪斜屈指書到日乞巧陳瓜瓜我我望夫山  
迢迢銀漢棧開械應有淚洒上牽牛花

苦雨戲成

癡龍喚不醒日日聞鳩啼客居苦卑溼積水與階齊城南尺五天  
我居南城西陰雲覆重幕愈覺天容低十日不出戶眼界愁迷離  
開閨試一望脫口呼奇奇誰傾萬觴成此滑滑泥朱門多轍迹  
深若溝與溪有時命駕出此境殊險巖泥深及馬腹通衢成夏畦  
可憐箭雲驥變作曳尾龜雙輪欲一轉艱過牛負犁平時鱗鱗聲  
追想猶依稀貴人在車中危坐愁傾欵譬如浪中舟高下不自持  
懸旌心搖搖觸柱頭疑疑此時執鞭者頗不愧其妻土糞滿面目  
相顧色不怡下車取負塗上車雞在柙見我傍檐立疾濺泥濺衣

晴日畏塵土欲辟無靈犀陰日苦泥濘欲涉無輶標不如且閉戶  
高卧等皇羲家山倘入夢酒熟梅如齋

富莊驛阻雨

愁霖爾何意留我住荒村濁酒難為醉空房易得昏墨痕沈蘇壁  
水氣冷柴門桑下拚三宿禪機未足論

都門秋思示俞少軒解元兼寄戴鼇峰嚴緇生兩同年  
人海茫茫自溯洄遣愁聊復一尊開孤吟欲與秋聲敵百感都隨  
月影來未了名心休作達慣經離恨轉生才頻年書劍飄零極不  
信黃金舊有臺

落葉聲乾草色黃無聊庭院又經霜  
卧攜書卷支殘漏閒踏莓苔  
送夕陽覽鏡自憐形略瘦  
銜杯人厭次公狂  
祇慙不解霓裳譜  
玉笛吹來也斷腸

麝煤燒盡雁書沈  
迴首鄉園思不禁  
雲裏關山孤客夢  
月中砧杵  
萬家心生偏耐冷  
憐秋菊倦即知還  
愧暮禽檢點寒衣更惆悵  
縵塵痕比去年深

咫尺天街記後遊  
墜歡一霎散浮漚  
紅燈綠酒息息過  
碎露零煙  
細細愁遠道音書難計日  
異鄉風景不宜秋  
昆明池水鴛湖月可  
笑東華倦客不

亂書堆裏儘消磨  
冷醉閒吟不奈何  
名士悲歌隨地有  
少年詞賦  
誤人多斷無駿足  
貪芻秣可有蛾眉老  
芋蘿偶見槐花翻一笑  
此身且莫恨蹉跎

消寒第一集

朔風蕭蕭戰枯葉  
酒人望酒如望雪  
凌晨寸柬飛而來  
一笑冠纓  
當索絕逢場且喜竿木在  
踏凍那愁屐齒折  
高朋相對發快論  
紛若浮雲互起滅  
泥中鴻爪偶然聚  
海底鯨魚定誰掣  
歡來未覺更漏永  
坐看燈花吐紅纈  
休文粟事楚金貓  
腹笥窮搜及瑣屑  
勝遊如此信可樂  
只惜韶光去飄瞥  
吾生失意亦有數  
欲記流年藉成

說慚無彩筆賦梅花空抱廣平心似鐵宗廣平梅花賦序云余春  
兩上春官  
年亦廿五

### 贈別

熱血灑何所濁醪知此心為君長悒快與世且浮沈謠詠皆成格  
文章自賞音明朝重話別更漏莫嫌深

### 題墨梅紈扇

凍墨有寒色幽花無媚姿夫君發清興寫此平生思此人如此花  
雪折霜摧之此花如此人石夢鐵作枝冰紈不盈尺慘慘生寒颼  
芳尊薦瑤席我賦消魂詩當筵索我笑花與人俱怡嚴城咽哀笳

我歌招魂詞披圖向花泣花與人同悲斯人遂千古斯花匪兩時  
可知愛花人不屑粉與脂

### 詠竹

剔盡銀缸夜漸分碧紗如霧夢如雲芭蕉不管秋消息收拾閒愁  
付此君

己未分校禮闈者庚申多重與此選張子青同年繪圖記事  
時余充內簾監試爰賦絕句二章為題圖後

珠箔銀屏咫尺間不成仙界不塵寰瑤池一度沈酣後祇許窗中  
覩阿環



玉宇高寒別樣秋  
自憐靈藥為誰偷  
傲他世上癡兒女  
得傍銀河看女牛

題馮文介公墨梅

熱血灑無地  
酒杯如此心  
良朋竟千古  
遺墨忍重尋  
夢覺孤山冷  
魂歸楚水深  
寒花吾羨汝  
未受雪霜侵

題鄒雲階太守乘驄歸省圖

驪歌聲裏去  
怱怱楚水燕  
雲望裏通  
萊綵一堂承  
愛日竹符千里  
走長風多君快  
叱王尊馭愧我  
空乘桓典驄  
偉績清名期並  
著有船載石柱  
標銅

臨平夜泊

出門今日始看  
山村市闌珊  
落照間船有琴  
書關吏笑地無  
險阻榜人閒風  
欺木葉黃千點  
秋老蘆花白一  
灣欵枕夜寒鄉  
夢醒半痕新月  
挂螺鬟

夜泊江干待曉  
始發適值潮至  
小舟顛播苦不  
得寤得長歌  
一首

錢塘江頭舟夜  
泊濤聲欲捲秋  
雲落江寒風緊  
不成夢推篷看  
月羅衣薄榜人  
夜起說潮生十  
擔行裝一葉輕  
隨潮忽起又忽  
落扁舟難與洪  
濤爭潮聲偏恐  
遠來客小舟上  
下如魚擲茫茫  
一望四

無際浩渺江濤浸蟾魄遙峰三疊五疊間潮頭十點萬點白擁衾  
欲寐夢遙醒把酒獨酌酬江靈須臾潮落舟亦定江清月墮星熒

桐廬

蓬背夕陽紅孤城閣斷虹幾家深樹裏一絲亂山中潮信近灘小  
江流繞郭通荒村無識者何處覓飛鴻

嚴江雜詩

秋風三日布帆飛上水翻喚下水遲一日九迴重又折古今那有  
斷腸時

嚴銓

字青選號琴史桐鄉及廩生有青選詩鈔

光緒桐鄉縣志公自少時刻苦為學足不出戶窮日夜治  
經史專精制藝以課徒自給而日必自課一文寒暑無間  
平生所作文不下萬篇邑人士言好學者必首舉公以為  
子弟勛秋試累薦不售晚年以納粟就教職將謁選而丁  
粵寇之亂航海入閩轉徙滬上歿後選新城訓導無子素  
不作詩五十後始為之為其亂離之况頗有昌黎風格

留別安昌

東風吹我掛歸帆話別溪西日欲銜三疊陽關一聲櫓落花和淚  
點春衫

贈常州丁詠於時在海船

家世丁鴻夙望高  
楷行不意接仙曹  
少陵作客詩成史  
太白乘舟錦製袍  
友事禮兼師事重  
中年人比少年豪  
萍蹤獨惜吹難聚  
陳紫何妨再醉醪

贈蘇州周桐雲

海風吹送客還鄉  
李郭同舟引興長  
好句驚人誰謝朓  
醇醪醉我育周郎  
年來傷亂渾疑夢  
老去論詩莫笑狂  
計日申江應再聚  
石榴花底倒蒲觴

初到福州

海風吹我到天南  
馱舌蠻音總未諳  
四境有山嵐挾瘴  
一城無水井流甘  
裏頭鄉勇能擒虎  
疏近村姬未識蠶  
獨惜巷南兼巷北  
周遭郭外儘窺探

懸脂山弔王氏陳李二后

累累香塚寄荒邱  
闕國曾經翟第遊  
北地懸脂金作井  
西湖風月綵為舟  
伊涼曲記鼎宮慣  
陶李恩承錦帳周  
哲婦梳妝問何許  
肯教貴主占高樓

鳳凰翩翩燕飛飛  
恰好新君啟繡幃  
削草近臣歸大諫  
妬花永巷老元妃  
朱幘位重專升色  
白馬名高孰繼徽  
紅豆久香紅荔綻  
玉

鈞登眺幾款

辛酉四月余避兵海上秋間館馬笠瑞寓所入冬浦東失守  
浦西戎嚴馬宅徙居閩省余亦挈眷偕往棲遲三月婦以  
苦思鄉里欲附海舶適歸家室流離客窗蕭寂感成四律  
寄青溪諸戚好

青衫幾度狎驚湍  
卸輕裝夢亦安  
失路有人憐駿骨  
不才無力謝豬肝  
澆愁借茗如心易  
排悶憑文創格難  
西望鄉關雲咫尺  
何時重拂舊雕闌  
誰遣勞身再遠遊  
根烽遍布浦東頭  
斷帆滾雪三千里  
短鬢凋霜

五十秋慰寂天將濤  
破夢送窮客有劍  
鷺鷥羅星一塔撐  
雲表難鎮詩腸萬種愁

榕陰一帶繞門閭  
結伴還鄉願總虛  
豚犬敢憑天作孽  
鵲鳩忍擾地成墟  
愁堆北苑茶香裏  
恨積南臺荔熟初  
如此哀腸如此景  
休將近况問雙魚

無端別緒動閨中  
萬斛船來自海東  
久住客慚鯢鱓澤  
遠行婦學蠶乘風  
半生蹤跡陶家甕  
十載功名楚國弓  
黃鳥歌殘鴻雁續  
哀嗽計有應聲同

三月間余欲由閩回里乃海舶愆期遲至四月下旬始得北

還詩以誌悶

春光九十擲榕城海上今纔問去程行李一肩書幾束桃花浪裏  
片帆輕

凌波何敢強爭先頻阻歸期意惘然却喜綠肥紅瘦後蓬窗飽啜  
荔枝鮮

題陸定圃教授庚申紀難詩後

申江一再至茲際肅肅兀坐苦無儔喜君相剝啄貽我一卷詩  
長歌欲代哭蹂躪徧省城我聞淚盈掬但我未入省無敢片辭續  
及言桑梓鄉情君受荼毒一字一悲酸一語一感觸憶昔歲庚申

孟秋所遇酷下澆二十三夜有兵馳逐問是天營潰鎮民亂竄伏  
我適竄鎮西妻妹一船跼延及仲秋初火光半天燭言寇亦西來  
脫逃苦不速益西抵七里僻港寄三宿穩卧風露間始免登鬼錄  
四日聞寇退遽返村中屋結伴出鎮行煙燭尚相屬先人廬未焚  
尚不苦露暴什物本空空况經倒箱麓家賊再加功僅存書幾束  
所悲同鎮人死亡不一足孰隕首田中孰橫屍路由孰遭飛火焚  
孰向奔流逐想因賦命蹇抑或守義確賢愚共一劫長眠呼不覺  
即彼被掠輩聞亦半就戮鎮北爛溪頭血攪澄波濁痛定復思痛  
君詩忍卒讀君現掌局事忠義儘收錄一死自古難鴻毛亦山岳

滿地莽兵戈不幸作凡肉無論中節否畢竟身未辱若諸婦女流  
所聞尤卓卓生不識丁字臨危持守篤可殺不可污即死骨亦馥  
間或身蒙垢究非心所欲律例況昭彰不太操之威可見賞所勸  
絕異吏斷獄寬大本至公人倫此正鵠讀書負誓言聊罄胸中蓄  
方今住家鄉如人受桎梏搜括日碎心誅鋤日怵目處處列闕卡  
即適易追前一旦遇變故留身難自卜脫欲從海上房金珠一斛  
食物盡騰涌誰禁此剝削且習尚奢淫豈是閩里福江南只片土  
安保無翻覆三面滄海溢一面黃浦澳雇舟非易易水濱枉躑躅  
總之丁厄運每進退維谷過慮出詩外自忘辭雜駁老成具先見

慎勿吝忠告往復燼一燈山鬼嘯林麓

余於辛酉五月下浣四日由申江赴甯渡海約行三日有奇

六月上浣七日挈眷由紹還申於十四日晚出口至曉即

已達岸蓋風有順逆故行有遲速因作前後渡海二歌

滔滔萬派朝東溟欲到未到轟雷霆况復蛟鱗挾風出噴水入船  
船為腥是時篙師亦束手孰衝巨浪揚孤舸由拳有客不從眾敢  
將性命輕浮萍促舟長行行肯駛天不助人徒驚人水以風激水  
忽怒風為水擁風無靈風力水力互作勢水力人力皆通神始苦  
南風或倒退宋都六鷁垂雙翎繼借東風乃漸進尺澤護屈因求

伸進若退有幾頓挂風及水不稍留停三日三夜彈人力帆樁亂攪煙冥冥再越一日風水定若中酒客醉始醒忽推蓬起坐觀海雲樹斷續出山瓏玲招寶一山插雲表突兀撐破青天青

破萬里浪行滄海以身試險誰與儔此事可一不可再如何狎水無時休我到山陰夏方季蘭亭不敢恣優游自紹及甯寬海客中自二日齊登舟全家兒女渺若粟半肩行李輕於鷗欲行未行歷三宿南風天未來颶颶風至舟師起理楫擘舟出口舟隨流有時舟直勁若矢李想入蔡驅貔貅有時舟側岌欲覆荀瑩折楚偏師適有時舟倏左倏右陳安壯士盤蛇矛有時舟忽上忽下三郎閣闖醉打球蒲帆十幅與雲逐雲或少留舟不留天風浪浪濤滾滾萬斛舟作浮漚浮一千里路一夜至早日未出蒲帆收

題岳笑山明經辨廉詩集

縱橫軍壘岳家遺一卷褒忠苦寄悲集詠李氏繹鐵板銅琶爭唱

遍耆卿應悔曉風詞忠勝國諸忠

劍南巨手譎仙人願曲當筵賞識真倚枕海濤驚捲處一時骨種助精神時寓居安昌地近海

書上海王丈花農廷銓明經聽彝錄後

敦善行不怠己人咸與新衣冠皆道氣天地此完人有定歧途屏

無偏正路循聰聰明訓在踐履本清純  
一卷足千古國門誰損增範圍留子弟規矩奉高曾上智完非易  
中材跂亦能賢關與聖域莫苦境無憑

### 周官勳

字朗亭桐鄉附貢生候選訓導加同知銜有香劍齋詩稿  
朗亭司馬個儻風流所交皆一時知名士駕湖于辛伯孫  
次公時與詩筒往還故其學日進風神駘宕氣格老蒼直  
造劍南誠齋之室其少時所詠如水晶簾未卷有人和月弄冰  
清妍羅襪凌波絕可憐昨夜水晶簾未卷有人和月弄冰  
紅白秋海棠云素質盈盈傍粉牆西風庭院正新涼夜深  
明月搖秋影背著銀燈暗斷腸楊花云未見開時見落時  
一番飄泊有誰知可憐化到浮萍日猶絆行舟怨別離採  
菱云(家)妾生小住湖邊只種湖菱不種蓮菱角心甜蓮子  
苦勸郎莫上採蓮船落梅云春光又是斷腸時羌笛無情  
次第吹寄語師雄休入夢美人已嫁莫相思已採入于辛  
伯燈窗瑣話



舟行

遠渚歛寒色乘流放畫船霧添帆勢緩雨滴水紋圓宿鳥迷雲樹  
歸漁聚濕煙夜深山影重愁壓夢魂偏

送岳叅却昭壇入都

老梅欲花天欲雪凍雲不飛朔風裂煨酒兀擁鑪坐故人忽驚  
來作別奴殘歲問何之少年長路輕驅馳文章辛苦經憂患南  
北風塵傷別離臨歧握手淚如線此後行踪等勞燕男兒七尺重  
致身努力何愁長貧賤長安百花春已開匹馬要繫黃金臺燕姬  
一笑弄絃索枯酒應待才人來况君久擅長楊賦相見定然得意

遇送君行矣我愴然片帆遠挂江天樹

懷人詩

意懶疎交友閒居只閉門故人今又別此意更誰論遙夜雁聲遠  
前却落日昏况當秋共去怎得不銷魂姚訪梅榭

滾大江流男兒此壯遊高山不礙夢落日易為愁河海新詩卷  
煙花舊酒樓何當遊釣處重與理扁舟孫次公融

之子渺天末相思兩淚潛風敲當戶竹雲畫隔溪山瘦骨知秋早  
勞身借病閒因之懷遠客惆悵掩柴關項榆林雲

忽以樹頭雨化為檐口聲長天一雁語遙夜故人情病骨詩同瘦

名心老更輕此來休便去鷗路有前盟鄔雨濃澗

双溪三月時啼鳥立花枝游子今何處故人勞遠思雲橫邊塞白

春到藥闌遲記得攀條日聽鶯有舊期張墨香錫昌

夜泊姑蘇

夜泊吳門近西風着水輕疏鐘敲客夢落月淡詩情兩岸霜楓滿

一星漁火明蓬窓寒獨坐無奈旅愁生

雪夜懷蓉却都門

一室白如此開門雪未殘伊人隔秋水鄉思渺雲端春日梅花瘦

杯深竹葉寒憑誰共幽絕獨抱素琴彈

正月十四日葛澹塘

佑銓

大招同張易齋桂森師徐阮船保

字

太守潘星槎文奎

上舍張雨杉光裕

陳我如

世澤

茂才集

飲聽花齋用東坡岐亭韻

食蓮苦在心啖蔗甘在汁甘苦兩不均英雄淚欲濕以酒破除之

此計亦良得相將出蓬門西風吹鬢急隔水望蒹葭比鄰雜鷺鴨

忽逢抱樸子招邀坐花幕燈懸玻璃青盞洗珊瑚赤更誇家釀肥

擊甕出三白為君甘醉死髮散不須憤斯時我最樂不作向隅泣

陳遵惜未來分題一人缺楚齋陳丈是日期而不至更深啼寒鷄詩成驚座客抽

筆寫牆腰字大似鴉集

十月二十二日于辛伯源偕沈養齋文浩過訪招同易齋師阮

船丈澹塘雨杉馬蘅垞蘭芬集飲深柳書堂分賦

夜窓愁聽北風催朝起蓬門却懶開寒信偶隨疎雨至征衣遠帶

客塵來辛伯客袁江初回鶯花苦憶三春別文酒空銷一代才示我新詩還

索和不容今夕不持杯

難得羣賢叙草堂何須相對限三觴暫留人似行雲住深喜寒銷  
客夜長往復河山餘想像評量風月當文章明朝便欲抽帆去依  
舊相思天一方

大風舟發烏戍和辛伯

萬木聲號蘆荻稀扁舟一棹趁斜暉鷺鷥亦解風波惡冷避灘邊  
不敢飛

探梅口號和嚴笛舟鈞

三家村屋盡編茅青竹籬笆護水坳一笑此遊輸凍雀破寒先我  
立花梢

墻根已種三百樹屋背添栽十畝寬怪煞山翁太驕吝閉門只許  
自家看

湖上同秦次遊光第作

踏雪人從湖上來喜看春向柳條回明朝作客仍游屐今日相逢

且酒枯老死蠹魚無俗氣行空天馬不羈才故鄉親友如相問為  
報清吟費麝煤

題嚴四心如 鏡清 廣陵雜詠詩後時有袁江之行即以送別  
南朝金粉散如雲一度留題酒易醺花影新聞張子野蕪城落日  
鮑參軍珠簾十里風三面樓閣千家月二分不敢灯前教按譜傷  
心我亦舊司勳

欲賦安居早束妝避兵有客感滄桑魚鹽已薄東南利筆墨猶含  
劍戟光香草美人餘懊惱寒潮疏柳總悽涼舊游夢影真堪紀廿  
四橋頭月似霜

當湖姚烈婦詩

中流有芳芷采采寒衣裳君家與妾家遥遥湖水長廿一為君婦  
春花連理芳琴瑟靜以和一室恒吉祥飾我黃金珥珮我白玉璫  
綺窗麗朝日照影雙鴛鴦何為中道絕孤鴻哀翔翔毀我黃金珥  
碎我白玉璫虛窗冷落日分飛鴛與鴛涕泣白翁姑血淚紅鞋僵  
翁姑有兒婦晨昏侍高堂妾夫無子女煢煢摧中腸披帷復入室  
坐我舊日床床頭有羅帶猶是嫁時裝惘惘不知處一息永悲傷  
君婦為君死大節懍昭彰流水去不回蘅芷千秋香

湖上宋朝小寺

別蘇讀殘<sup>遺</sup>碣精藍記宋朝殿高灯燭短野澗磬聲遙壞塔頽殘日  
山門對小橋未能參<sup>參</sup>正覺塵顛也應銷

閒居

閉戶息塵事閒中歲月長早春鷄笋嫩晚飯馬蘭香疊石圍新樹  
挑泥補壞墻笑他梁上燕來去為誰忙

昭明太子讀書館題壁

湛湛青溪流波下叢祠叢祠卷遥碧清磬一何悲苔草上階綠  
薜蘿紛離披帝子今不作寂寞西風吹文選樓已圯渺與千秋期  
猶存禮賢處松杉影離離斜陽淡古塙題詩聽子規

由虎跑至錢塘江

冒面西風落葉殘青山依舊碧雲端倒垂不死藤蘿老下瞰奔流  
水石寒列盡九溪十八澗行纔半里數重巒錢塘此去無多路正  
好江潮月夜看

贈馬蘅垞<sup>蘭芬</sup>

長嘯此天地蓮花大辯才詼諧含道妙意氣絕塵埃夢斷秋風雁

時君弟秋釀初故秋釀亦予詩友也

詩題石徑苔問梅開幾樹為寄數枝來

君有問梅詩集

秋日憶玉珊

空山深復深秋漏夜沈沈明月入我室故人遠在心忽來天外響

獨撫松間琴萬籟一以息渺然誰賞音

寄懷曹海槎丈

大經

燕雨住巖阿窮愁奈爾何事經貧後少詩入病中多吳楚熟雙屐  
煙波老一蓑慰君還自慰我亦嘆蹉跎

寄懷吳薇階楷

燕地柳條青驅車事遠征關山遊子淚灯火故鄉情夜月人千里  
高樓雁一聲因風寄書字不敢問歸程

送蔣雲谷雲司馬之山左

脫身邊塞地寂寞老巖阿壯志秋薄雲詩情落葉多湖山雙白鬢風

雨一青簑復出此門去天涯奈遠何

登六和塔望錢塘江

人如老鶴奮雙翼扶搖直向雲端立下瞰人民蟻虱微帝座真疑  
通呼吸又疑平地入青天拾級不顧腰脚綿螺旋而上至絕頂但  
聽江水聲嗚咽長江滾滾水三折東流到海派分別鯉魚浦口雲  
擁山鼉子磯頭浪堆雪眼前惜無八月潮紅旗白馬雲中遙鼉鼉  
無聲蛟龍睡水波不作塵心銷湏臾一鷁翔空影東岸越山疏以  
整西岸人家密竹排街聲市語交相併我身亦從塵中來天風海  
月同徘徊上聽落日鈴鐸急下聽琳宮鐘磬催日暮興闌下山去

眼光閃爍胸無慮歸來夜卧心搖搖夢魂猶高處

煙霞題壁

百折千盤處溪巖到此分流來橋下水半是洞中雲石佛坐松葉  
怪鷄啼夕曛僧房秋夜坐窻月白紛紛

客來

有客敲門入整肅衣冠接大兒十三能喚茶小兒七齡能拜揖  
人莫笑囊無錢我典殘書供客筵殘書典去有時贖佳客不來門  
戶俗

餘杭道中

扁舟搖兀古餘杭茅屋柴門石子墻城郭圍將山四面樓臺露出  
水中央人沽楊柳旗邊酒春在梅梢雪後香何處泉聲流不住邨  
邨雲水碓斜陽

吳興舟中

溪山一起還一伏溪水一直復一曲我行正在山水間西風為送  
滿山綠披襟獨坐秋風涼四面八方荷花香背語舟子漫搖艫此  
行不惡何須忙買魚沽酒得竟醉翻倒船頭一覺睡起來揩眼看  
溪山依舊疎紅間新翠平生最愛謫仙詩所惜隨讀隨忘之蓬窻  
無事擁書坐詩若讀完應到時

阻風八坼舟中買得魚酒甚甘

太湖之濱無纖鱗一魚往往什百鈞  
竭來八坼阻風住玉壺買得  
梨花春蘆花颯颯秋風爽  
隔岸漁家初挂網一雙銀刀  
跳出水大者徑尺小跨掌  
洞庭橙子泥金黃香膚作殼  
醃作漿佐此晚餐下酒物  
牙車爽脆飛冰霜波神擘  
月作團扇一夜打風捲河  
面太湖七十二奇峰飽看  
不與周郎便陽侯恐我愁  
且慌故遣鱗魚新酒  
嗜陽侯美意亦須領陽侯  
惡詭終難當

秦良玉畫像為蘭泉題

豐肌威鬚英風逼湘桃  
面目冰玉質胭脂馬上  
白捍鎗猶作當年

征戰色西郵頻鼓動地  
驚中原豺虎日縱橫  
幾人決策安全蜀有  
女揚眉獨請纓鳳凰  
草木千峯翠登壇叱  
咤風雲隆長安萬里  
遠勤王廿年威鎮蠻  
方帥捷書早報紅崖  
春麟閣應圖百戰身  
同心尚有雲英女殺  
賊羞矜婉孌名白浪  
河北旌旗開留守曾  
從此地來酸心弟妹  
喪王事慘目河山化  
劫灰烽煙不息心不  
死將軍忠義巍青史  
功成博得錦袍還平  
殿召見天顏喜苕川  
畫史湘川娥短衣窄  
袖摹煙螺饒君空有  
漆毫技怎畫娥眉戰  
績多軍書咫尺鄉闕  
近談兵空抱書生憤  
焚香頂禮拜將軍青  
衫千古慙紅粉

重遊大滌山



水從天目發源來直瀉南湖紫碧水大滌一山天目西盤兀笑蒼  
煙裏却從山口望山頭餘杭城郭參差起洞天卅四不可名惟有  
苔錢繡屐齒白日維僧束炷前攝衣偃背蹶雙趾穿梁白蝠觸衣  
巾巖腰石鼓敲鞭箠履聲鏗爾伏蠓驚濕煙濃烈潛蚪死仰頭一  
孔漏天光恍隔仙凡爭尺咫東南異境一眼窮出山花竹紛青紫  
危坡狼石蹲清流搖兀光風香白芷騷人魂散若為招傷心極目  
春千里我本住家山水窟疊嶂雙峰思故壘名山雖好不如歸一  
聲鷓鴣花前始

金華道中

岸竹齊欹綠林花無數紅試將枝上雨散作袖邊風雲走雙頭馬  
橋森百足蟲看山思好住歸興奈忽忽

望後月未落忽于水底眠波吞楊柳濛麥過鷺鷥肩漚漩碧浮葉  
林花紅亞船蘭溪遙在目悵隔暮雲天  
兩日船中坐愁儂只逆風却從平地上再入萬山中細草攔前綠  
零花退後紅芒鞋兼竹笠隨意步蠶叢

夜泊蘭溪水驛

今宵重小住此地舊曾經燈火秋風碧雲山眼界青一眉畫新月  
萬粟種江星得此堪無寐蕭然酌醪醕

雨後望桐廬諸山

路轉山奇絕人來春乍逢  
洒將新水雨洗出碧芙蓉  
變幻百千狀  
巉巖三數峰  
遠看應更好知隔翠雲重

游餘杭山

九折山深鎖千盤  
路曲藏似難容馬足  
何處更羊腸  
險道今方始  
歸心遠未忘  
怪他寒甚日反得汗流漿

厭雨思前夢  
貪山誤去程  
屹天雙壁起  
漏日一峰迎  
病竹依人瘦  
餘花照眼明  
寒聲聽不得  
恰恰亂鴉鳴

歲暮忘羈旅  
天寒繫客蹤  
隔溪三四屋  
對面百千峰  
穉子敲冰立

冰立村翁撐杖逢  
野梅開正好  
作意為誰容

夏日感懷

墻陰悔不種芭蕉  
夏日涼生暑可消  
樽酒難酬何況雀  
絮袍已典  
莫論貂裘諳世事  
因離亂無恙  
妻孥慰寂寥  
若問近來銷遣計  
一床書檢一挑鐙

故園松菊久無存  
廡借蕭然水月村  
名刺毛生羞作客  
菜根味慣  
早闔門避秦倖  
免沙蟲劫  
展卷空留蠹粉痕  
我與老槐似舊識  
午陰清處坐開樽

烽火鄉關五載侵  
太平時節又而今  
一官雖冷嘲聊解  
八口無多

累已深貧到妻孥厭青簡悔教灰土換黃金商量乞取雲林筆畫  
我攤書讀柳陰

囊空金盡不知愁酒熟花開客便留水自源清何礙淺蘭因香遠  
故稱幽于今名士多于鯽此後雄心淡似鷗最是有情梁上燕依  
然認我主人投

家具紛紛付劫塵不堪重問舊花晨學詩慣習羣賢派記事新搜  
干寶神貧未賣書留教子饑甘吃粥免求人筭來百畝田猶在耕  
讀何妨老此身

和李鶴杉丈

日熒

重游泮宮詩

泮芹不改舊時馨週甲爭看此再經同案有人憐髮白後生隨我  
賦於青才高朋輩無餘子老去光陰又復丁自笑少年叨末座借  
將春酒祝長齡

一官何必限窮通重聽鸞聲到泮宮八十年華真老輩五千道德  
舊家風精神不讓雲中鶴談辯渾如水上虹重賦鹿腰脚健長庚  
原是玉溪翁

食笋

春筵招朋從旨酒佳看何物最及時有笋堪充庖短籬迸蘚班驚  
雷破苔坳曉掘付刀匕露粉猶內色堆盤吃美玉虚心成澹交鮮

配櫻桃宴香勝豆蔻芭村鷄哺新雛乳燕來芳郊劇憐太守饒甘  
受心咒嘲清蔬佛可供微醺詩初敲近來厭食肉此味殊難拋莫  
待凌雲去風煙拂長梢

葉奎保

字蕙田歸安諸生著有碧巖紅燼集  
蕙田茂才綺歲遊庠才藻富有作文援筆立就洒洒洋洋  
不拘繩墨尤長於經解古學為時輩所推重鄉闈屢薦不  
信抑鬱以終

古鏡

何年佳鏡鑄青銅歷世猶藏寶匣中光怪一騰蟲篆碧妍媸都付  
土華紅閱人肝膽千秋盡照我鬚眉太古同珍重一歛舊明月夜  
深猶露漢秦宮

古琴

珠篆鐫銘鑿蜀琴鼎彝同證古人心桐焦不共劫灰散梅落誰憐

明月沈招得涼蟾  
皆風慧除非老鶴  
是知音水雲從此  
傳真趣海上成連  
何處尋

酬許蕭生郡博正綬消暑

我意究云何難求  
安樂富虛堂螢闌  
入窄徑鼠飛過聽  
雨喧紅藕牽煙補  
綠蘿煩襟無處滌  
點筆問天河

詠夾竹桃

桃花渡畔竹溪通  
倦倚斜陽笑靨同  
嫵媚何傷名士氣  
幽閒饒有美人風  
影分露井連番翠  
淚點湘江一樣紅  
畢竟此君瀟灑甚  
珊珊骨月明中

秋宵

秋宵涼夢醒檐角  
月微明詩意何酸  
楚三更絡緯聲

秋日水村雜詠

一曲迷陽未足憑  
溪光啓鏡潔於冰  
十三嬌女不知恨  
慣向西風采野菱

隔溪樹杪片帆飛  
紅影依稀動夕暉  
風信已寒霜信早  
碧蘆花落鱖魚肥

一角涼風度塔鈴  
三更微月小茅亭  
豆蔻籬落飛黃葉  
點綴南朝蟋蟀經

連朝冷露溼蒹葭  
幽訊都違處士家  
深恐秋光消瘦甚  
膽瓶添水浸黃花

卧病遇中秋

虛度中秋又一年  
擁衾僵卧藥爐邊  
天涯山水幾無分  
海內親朋太寡緣  
病久似因今夕重  
月明仍是故鄉圓  
觴聲到枕關心緒  
未識誰家放酒船

登道場山偕臧耘蕉

人語幽而僻  
山容瘦逾奇  
笛高秋靄薄  
鐘遠暮雲遲  
黃葉樵夫徑  
蒼苔處士碑  
紀游頻感舊  
白雪上吟髭

冬宵感作

游俠無人鑄  
太阿洗兵何以挽  
銀河寒宵風雪窮  
愁極亂世干戈戾  
氣多萬里征鴻悲  
自語千年老鶴病  
堪磨捲衣秦女垂  
紅淚曾記邯鄲道上歌

塞下曲

愁雲惨淡朔風生  
鼙鼓淒清牧馬鳴  
白骨成灰猶入夢  
紅顏不死總無情

華副將歌

華副將諱爾西洋美利堅  
國人咸豐六年偕弟華某友白

聚文來滬通商旋策名從軍改隸中國籍十年迭膺觀察  
吳煦楊坊保舉統帶西洋兵出師勦賊克青浦復嘉定屢  
立戰功同治元年抵慈溪禦賊衝鋒撲入賊巢中槍傷穿  
胸穴遂死於難遺命死後當從中國冠裳加殮葬松江因  
作長歌弔之

西洋矢精忠紅衣撒鬼雄火輪飛駛東溟東萬頃紫瀾貫白虹華  
將本係美利國策名改隸中國籍上副中丞知迭賴戰觀察力一統  
大洋西兵權頗動英夷貴客色弱弟快從征白友整副營精練洋  
槍隊一日三閱兵英國法國聯臂指中外會防振軍聲賊眾由是

聞聲畏不敢輕瞰松江城軍門鼓勁迭戰迭制勝積歲紀戰功  
莫如華軍盛青浦久為悍賊踞毒氛屢迫黃浦隅皖南驍將切齒  
恨冒毒身無完肌膚華將頒兵符一心雄萬夫運謀閃睚目激怒  
豎此鬚擁火撲入虎狼窟棘鍼一躍輕于鼉飛刃殲醜如芟草立  
馬肅清淞西區再忠賊氛煽厥維嘉定縣駛船縱火攻轟霆走碧  
電精銳折衝壯先聲滬軍應後奮血戰此時勦撫功兼施拯民出  
難不勝算兩度行軍各制奇雄風捷報紅旗面浦東防禦績尤多  
漑血快斫生蛟鼉添陣雲護金山衛利鋒霜刺黃瀆波金槍鐵杖  
并一手東漢西將無出右詞臣搖藻光江蘇歡聲騰躍吳淞口一

且戰艦下慈谿英氣裂碎青玻璃部卒夜夢將星隕枕戈破膽不  
敢啼華將未陷難時部卒夢見將星隕西南方先采先紫後白華將奮身先士卒仍如往年多  
衝突豈料仗賊啓毒槍陡遭火彈穿胸穴倉卒論軍痛訣別遂捐  
一軀全忠烈吳越傳其訣別詞江干灑淚不勝悲殮棺必用中華  
服築冢須立松江涯西兵大權白將替兵令聽命中丞麾後事悉  
遵華將意中外鞏固金湯基噫噫吁嗟乎遐哉載銘誅輝青史非  
惟外國罕有德中國亦少人可擬中丞奏云例於中華驍將固已難能稽其先世不得詳一弟一友後親美柱年往甬納小妻鍾鼎可貴襲歎惜無子英軍何伯堪從禮滬上欣看銅柱峙節義感發西洋

津祠祀高齊南海神紀事終壬戌書年始丙辰生前功績死後譽  
中外允推第一人

### 鷹窠頂觀日出

鷹窠臨海何穹窿紫氣下射蛟龍宮亭皋落木響暮鴻塞籟盡亞  
洪濤風我來正逢夕照烘石壁倒影翻海紅須臾煙靄來錦幪蒼  
然暮色西溟通薄遊到此何息息夜投佛寺上巖櫺星月玃璦雲  
朦朧是何意態傑且雄清宵不入夢境惜俄焉仰見斗柄中霜鐘  
未動寒猶蒙忽有紫霧印雙瞳輝抗雲霞邁霓虹倏飛紅鏡出海空  
如鑪熾火練赤銅迭出迭入隨水涵日力直欲扶桑窮飛馳之疾



迺過駿果果圓旭升於東對燭鷹窠光熊熊薄游奇絕地難同

擬朱子壽母生朝用原韻

閱歷世態多炎涼承歡且自躋北堂堂有壽母壽且康延年不藉  
後苓方課兒績學中心藏經訓留舍無或荒祀初筮任忌竈煬久  
守貧素不引觴恨無甘旨佐酒漿雖有護草憂難忘壽母謂兒貧  
何傷榮枯由天命靡常唯仁可祝壽無疆勉兒勵德健且剛兒迺  
長跼謝阿娘自天降福昭慈祥但願歲歲生朝內長如今日樂徇  
祥

同治己巳六月烏鎮白蓮寺塔為風雨所傾紀事

雙谿標雙塔烏墩青墩前一塔名壽聖一塔名白蓮白蓮獨歷劫  
前年被火然頓作禿筆禿莫認秋毫巔夕陽無顏色焦土誰為憐  
今年患水火苦雨多聯綿更患夏日烈紅繖加火燁數日烏驚噪  
其聲何喧填行人占異兆猜疑難驟宣一夕風雷暴其聲繞塔旋  
此時塔應倒如珠沈深淵何為巍然立不崩亦不竄歷昏而達旦  
照旭明青天迺為峭折響劈剛兼裂堅瓦甍不遽墮故作片時延  
預使行人避如拯之出川脫落如霜雪傾頽不倚偏咫尺皆民舍  
竟不損片椽異哉鬼神力呵護果不愆人咸覘其異有說譁然傳  
鄉曲最可恥論說有所沿謂塔梁時建礦灰踰千年取灰配藥餅

堪傲壺中仙聞者紛紛往遠近踵跡連櫛囊攜筐筥採頽必爭先  
不知宋始建厥後多變遷屢毀屢修葺論說無可牽幸有文獻在  
振贖抵鏡縣卓哉功不朽千古重簡編

陸鈞

字潤珊桐鄉人監生有桐韻軒詩鈔  
潤珊上舍隱於市好古人書畫尤善鑑別古玩能作懷素  
草書識者寶之其舅氏李鶴杉郡博稱其秉性純粹賦質  
淵雅其發為詩也情深以遠味清而長頗合溫柔敦厚之  
旨洵非虛譽

落梅感賦

笛滿江城月滿村暗香何處覓黃昏玉埋荒土春無跡露冷冰肌  
淚有痕驛使未逢難寄恨何郎老去總消魂怪他幾度東風惡寂  
寞詩人酒一樽

題耕煙散人畫桃源圖

石田茅屋高人跡  
流水桃花世外村  
中有未燒書萬卷  
也消歲月課兒孫

一重雲樹一重山  
雞犬桃花水一灣  
不是漁郎親到此  
誰傳圖畫滿人間

題踏雪尋梅圖

朔風烈烈吹長空  
霏玉屑壓遍隴頭  
春寒入清癯  
骨山凍不流雲  
林晃鳥無跡  
中有探梅人  
踏破一天雪

送孫鶴壽過錢塘

勸盡離亭酒  
君愁我亦愁  
明朝江上望  
惟見月當頭

悼亡室陳氏

羹湯洗手奉親娛  
食性當初尚記無  
今日小姑零落盡  
重泉結伴侍翁姑

當年妯娌本同懷  
生死誰知命不諧  
我痛弟亡卿哭妹  
可憐玉樹一齊埋

百年偕老原如夢  
我列中年夢竟違  
不及春來梁上燕  
朝同居處暮同歸

飄零身世儘蹉跎  
情到無聊可奈何  
營奠營齋更何益  
此生自問

負卿多

送李穉杉表兄攀雲赴嚴州

娛情詩酒暫勾留  
又向秋風送遠遊  
曲徑疎林迷望眼  
輕帆夕照動離愁  
地分吳越人千里  
天共關山月一鉤  
笑我嚴陵空有約  
約同赴瀟瀟夜雨夢羊裘

宮怨

君恩望斷意如何  
自古紅顏薄命多  
滿院落花開不掃  
昭陽別殿沸笙歌

昨夜花開一捻紅  
倚欄無語笑東風  
玉顏空向愁中老  
翻羨琵琶

出漢宮

吳門返棹抵太師橋  
憶前年送周幼梅愈北行

送君苦水北  
老我雲溪東  
君去不復返  
滄桑恨不窮

甲子初秋幼  
全家絕音書  
何處問骨肉  
幾人同今日  
橋邊路泣然  
繫客蓬

看菊偶占

靖節歸來託意深  
高情長寄不絃琴  
自慙落拓風塵裏  
也道黃花是賞音

莫道娛情總是春  
一花開後一花新  
千紅萬紫皆成夢  
冷淡交情此最真

題水墨牡丹

漫誇魏紫與姚黃  
富貴偏教淺淡粧  
如煞洛陽三百本  
天香翰墨痕香

七夕有感

三年別思夢難招  
又見銀河渡鵲橋  
池女不知離別恨  
一庭瓜果鬧終宵

舟抵吳門

盤門行盡接閶門  
劫後樓臺壁僅存  
滿地落花名士淚  
漫天飛絮美人魂  
采香有徑憐新月  
響屧無廊認舊痕  
明日虎邱重放棹  
不

勞檀板共金尊  
林君復句

題竹陰課子圖

一雨生涼清影散  
修竹幽人坐其下  
色映鬚眉綠有兒  
肖龍孫五車教勤讀  
耕讀本家傳家聲  
仍可續不羨燕山桂  
雅愛箕箒谷我觀寒林圖  
七賢無此福

寫懷

梨花昨落燕歸梁  
鎮日無端惹恨長  
處世不耽陶令癖  
著鞭休笑祖生狂  
十年舊雨升沈感  
憶梅周十里新詩贈答忙  
謂李任事莫教回首問  
春來容易鬢毛蒼

送友人入越

離亭惜別意匆匆  
迢遞關中望眼中  
千里愁分江上月  
一帆晴掛海邊風  
思君雁跡原無定  
慰我魚書恐未通  
從此小窗風雨夜  
孤懷長在鑑湖東

幽居

半畝蓬廬五畝桑  
幽居勝住水雲鄉  
多栽修竹能醫俗  
少著新詩不礙狂  
燈火夜寒童煮酒  
爐煙曉燼婢添香  
日長睡起心無事  
閒榻黃庭一二行

陸 鉞

字書三桐鄉人監生有茶齋室吟草  
書三上舍與其凡潤珊同受詩法於舅氏李鶴杉郡博雅  
置身閨闈而一窗燈火相與討論機雲流風於茲再見充  
以學力所造當未可量惜不永年而歿

登壽聖寺塔

獨上浮圖接翠霄  
下看飛鳥與雲飄  
望中樓閣千家小  
目盡河山萬里遙  
幾處鄉村餘戰壘  
一灣秋水剩危橋  
憑欄無限滄桑感  
指點芙蓉憶六朝

秋夜有懷李禪杉表兄

孤燈茅檐下唧唧蛩亂鳴涼風摧落葉蕭條動離情有客在嚴瀨  
相思共月明渭陽去東鐸萊衣羨同行一別幾千里悵望隔雲程  
憶昔從君游諄諄教何誠嗟予空碌碌讀書愧無成歲月已蹉跎  
感時心暗驚况當秋夜靜萬籟皆秋聲懷君不能寐坐看星斗橫  
即事

隄柳含煙雨乍晴綠陰深處鳥聲清野花開落無人管一任東風  
吹滿城

晚泊

一棹煙波裏輕帆落日收樹高樓宿鳥水淺渡歸牛沽酒人喧市

推蓬客倚舟萍蹤思小飲聊解旅人愁

哭輓舅氏李鶴杉先生

文星一夕隕衢城公卒於衢州府學任噩耗傳來淚欲傾杖履尚思追色笑

音容今已隔幽明冷官未竟生前志大集應留身後名遙想講堂

斯日哭風吹桃李作悲聲

皓首窮經繼昔賢名山事業手親編病書曾子臨終句舅氏自題輓額曰吾

知免壽逾淵明自輓年舅氏自撰輓聯泮水重游留絕唱蓬萊歸

去謝塵緣高才千古光文苑豈僅遺詩萬口傳

里門迎祭奠壺漿如雪麻衣拜道傍華表招魂今日淚高堂介壽

去年觴世緣變幻空千劫人事滄桑夢一場豈料閒吟成讖語  
前追憶信心傷萬氏重游泮水詩有六十年中春夢過百  
一曲成連海上琴移情愧我未知音祇緣朽木難成器徒使良工  
苦費心五夜青燈期望切三年絳帳受恩深而今怕向州門過華  
屋山邱不忍吟

壬午八月朔日吾鎮忠義祠落成偕友人往觀賦詩志感  
丹心碧血著吾鄉忠義堪垂百世芳兩鎮烽煙悲昔日千秋俎豆  
重斯堂克全大節應崇祀未發幽光賴闡揚我仰靈祠思往事廿  
年回首暗神傷

殉節同時事可哀春秋祭祀長官來已叨 聖德光泉壤應慰忠  
魂泣夜臺千古芳名留宇宙五年積血滿塵埃一鄉咸感及山吏  
搜表幽芳遍草萊

烈婦吟并序

烈婦顧氏吳江縣南麻鎮顧春山之女也去年秋氏年二  
十四歸青鎮監生張慶霖為繼室伉儷甚篤前室遺有二  
子一女氏愛之如己出歲暮慶霖忽患咯血二疾醫藥罔效  
氏含淚侍奉禱天乞代而慶霖日漸危重於今春遽卒氏  
悲痛欲絕誓以身殉戚族勸之不聽竟吞金同日而死時



光緒丁亥二月廿四日也距結褵之日僅五月耳嗚呼烈  
矣因作詩表之以俟采風者之請旌焉

精衛悲鳴痛夫死衛衝石欲填東海水苦心莫歎微禽癡貞魂烈魄  
都如此願氏有女孝且賢深閨歷練年復年張子心傷錦瑟篇媒  
妁殷勤勸續絃南麻青溪一水連紅絲早結三生緣女年廿四為  
新婦孟光喜得梁鴻偶膝下芝蘭前室遺愛如己出意慈厚琴瑟  
初調月五圓夫忽病危醫難痊告天乞代淚欲竭天何不許夫命  
延夫有兒女雖未長夫有兄嫂堪教養殉節容易撫孤難妾願就  
易歸泉壤戚族慰留堅不從吞金就死何從容光緒年次丁亥歲

二月廿四同夫終生則同室死同穴天長地久無離別鴛鴦塚上  
連理枝千載猶聞遺烈芳吁嗟乎烈士殉名身命輕烈婦殉夫何  
知名泰山鴻毛等一死死得其正死猶生

家兄潤珊著有桐韻軒遺稿蒙孔君琴伯願君星甫細為校  
勘並轉乞嚴緇生太史一序用聚珍板印刷數百本以冀  
流傳賦此銘感

人貴留名豹留皮及世無聞良可悲斯世榮名重勲業研朱滴露  
人罕奇男兒生兮悲不遇閉戶且復柔章句老去思傳身後名里  
巷難期青雲附阿兄懷才志未伸家貧好學多勞辛苦吟靜思僧

入定鍛辭鍊句追唐人奚囊心瘁李長吉壯年忽抱維摩疾太歲  
在噩夢遽遭病餘吟罷悲絕筆鶴鴿原上草蕭蕭吟魂縹緲何處  
招傳家空遺詩一卷嗟我無力難開雕風雨對牀今無及回首茫  
茫百感集五夜吟聲久寂然愁聽寒雁嗚嗚吧孔顧二君雷陳交  
書未索將遺詩鈔風義如此死生感感激不僅吾同胞聚珍板印  
千本出此後不須愁散佚九原應知己恩未了心事今已畢嗚  
呼生前抱璞空自憐身後誰識方干賢幸遇及山達叟主風雅耐  
驥敢望千秋傳

盧景昌

字小覺桐鄉人同治癸酉科舉人著自怡齋詩稿

讀先師嚴琴史夫子遺稿敬題二律

飄泊頻年笑白頭片帆飛渡海濱秋波濤入筆驚奇句風雪移家  
悵遠游亂後文章多感慨生前歲月半窮愁行囊不及詩囊富閩  
僑吳淞一望收

留題片紙墨猶濃一卷殘編意萬重去國蘭成揮別淚感時杜老  
話行蹤秋風空薦三霄鷄夜雨愁聽四壁蛩惆悵師門零落盡遺  
篇讀罷想遺容

曉渡汾湖

曉來煙氣正微濛十里湖光四望空一幅征帆風迅速櫓聲時雜浪聲中

石港投宿

一天沈暮靄小市尚塵囂比戶蘆編屋鄉人皆用蘆葦作牆壁凌波木架橋  
檣帆收淺渚燈火話終宵預聽舟人約來朝趁早潮

客中度歲

鼓棹出門去怱怱逼歲殘雙親勞夢遠孤館託身安且盡一杯酒  
因消此夕寒家中應守夜笑語共團藥

新年題客館

年華倏轉化工齊旅館無聊夢欲迷殘雪未融梅吐蕊輕煙初罩  
柳含美韶光過眼駒頻度佳客臨門鳳莫題知否東風來有信天  
涯蹤跡感鴻泥

訪二陸草堂

雲間留勝地兄弟姓名存分住兩頭屋同居三泖村宅環禪舍古  
文入選樓尊鶴淚不堪聽荒涼草掩門

晚泊西塘遇雨

天際陣雲起夕陽忽斂紅溪流今夜雨人坐滿船風靜聽戍樓鼓  
急收漁艇蓬鄰舟歌水調殘夢櫓聲中

秋日即景

尊籬喚賣夕陽天  
峰泖漁家醉月眠  
正是秋來風味好  
渡頭閒泊  
李鷹船

題德清張仙槎蓮社三生圖

靜坐蒲團兩鬢華  
三生慧業訂煙霞  
前身本是鄉嬛客  
曾伴仙人  
掃落花  
超然物外見天真  
金粟如來證夙因  
笑我黃梁猶入夢  
年來仍踏  
軟紅塵

題朱蓮夫同年廷慶紀游草

醞舫風流足繼聲  
翻少年少早知名  
旗亭他日爭傳唱  
藉甚才華  
四座傾  
踏遍紅塵憶去年  
游蹤來往路三千  
申江花月燕臺柳  
曾共開樽  
對綺筵

擬杜少陵七律二首用原韻

堂成

曾記秋風屋破茅  
蕭條第宅傍荒郊  
特開蔣徑依篁竹  
似結陶廬  
拂柳梢  
暫別偶同鶯出谷  
倦游好比鳥歸巢  
一家骨肉聊團聚  
落魄  
醜頻年強自嘲

賓至

丰生自歎窮途老萬里空悲蜀道難  
忽有知交今雨至非關厚祿  
故人干門庭側徒時迎駕樽酒論文愧  
勸餐每願親朋常聚首  
浣花溪上好憑欄

祝皇甫霞卷六句雙壽

持正家風重梓鄉典刑爭仰魯靈光  
名山待就蒲輪聘博士新分  
貢樹香直欲豪情傾遠北海何妨諧語學  
東方六句眉壽齊鴻案介  
雅羣來進彩觴  
矍鑠精神命世英春風槐市問前程  
犀軍屢冠文壇將麟史胸羅  
武庫兵不藉杖鳩誇健福疊邀薦  
鷄早馳名他年得遂青雲志始  
信龍頭屬老成

和嚴公繡錦題壁詩四章

草堂嘯詠絕巖譁風雅真堪步浣花  
四壁書奇皆漢魏半條卷曲  
有蓬芭閉門自著千秋業攬鏡休嫌  
兩鬢華茗椀鑪香聊位置清  
閒却似野人家

家住青溪煙水東吟風弄月奪天工  
騷壇健將推嚴羽絳帳名師  
媿馬融留客最宜陳榻設買春休慮  
阮囊空笑他裘馬諸年少奔  
走徒勞踏鞅紅

小樓風雨聽瀟灑，溪水平分舊板橋。對酒何妨談夜永，栽花最好待春朝。謝家羣從才都慧，蔣徑三條路不遙。從此滿庭生意足，雅宜綠竹與紅蕉。

蒿目風塵世事非，山林小隱宦情微。踞牀逸少容高卧，乞食淵明尚忍饑。不厭敲門詩債索，有時著屐酒家歸。他年得遇蒲輪聘，翹首雲程好奮飛。

題張韋孺司馬佩韞雙橋餞別圖

捧檄梅涇上，人和政又通。催科嗤吏俗，對酒見才雄。好共評書畫，相將話雨風。雙橋聊祖道，揖別太慇懃。

金陵懷古

六朝風景至今存，遺蹟重尋白下門。明月猶依江令宅，青山常對謝公墩。後庭玉樹空爭豔，詞客銅琶易斷魂。莫上臺城回首望，無情楊柳尚翩翻。

瓊枝璧月賸依稀，故國飄零事已非。埭上鳴雞迎翠輦，橋邊飛燕認烏衣。南朝樓閣金蓮步，北固江山鐵鎖圍。虎踞龍蟠開霸業，猶留形勝壯王畿。

廣陵懷古

平山堂上溯清芬，勝地名賢迴出羣。官閣吟詩何水部，蕪城感賦

鮑參軍千條碧柳隄三面十里紅橋月二分多少離宮餘舊恨年  
年芳草映斜曛

形勢東南控上游仙人騎鶴慣留名園異種開金帶荒塚香魂  
弔玉鉤一代選樓凌斗宿十年春夢話風流竹西歌舞亭何在尚  
有吹簫盪畫舟

大梁懷古

西風古堞幾經秋衰柳殘陽一望收絕代鶯花憐良嶽舊時燈火  
豔樊樓危城九折河聲壯故壘千年塔影浮猶憶分疆當楚漢霸  
圖爭畫鴻溝

太息東京一代才詞章無復問鄒枚翠華北狩留沙漠花石南來  
付劫灰佛殿徒存相國寺河隄長鎮禹王臺金門池上聊憑眺永  
黍中原亦可哀

臨安懷古

南渡蒼黃帝子來趙家國祚待重恢金牛小據山河險泥馬中興  
社稷開運啓九哥徵異夢天生四將本奇才燕雲不復真堪惜欲  
訴牢愁且舉杯

世事偏安夢未醒君臣甘作小朝廷更籌頻打蝦蟆鼓相業空遺  
蟋蟀經半壁江山飛雁白六陵風雨泣冬青鳳城舊是繁華地道

上曾傳王輦停

李鶴杉廣文丈以重樂泮游圖命題敬步原韻并賀八旬雙

壽

幾生脩到散仙身笑向黉宮試角巾  
後進追隨翔壁沼盛朝徵聘  
待蒲輪樽前白髮心偏壯篋內青衫色尚新  
更喜桂蘭俱秀發承歡晨夕侍萱椿

秋風憶折月中枝名士聲華蓋代垂  
後會還期歌鹿野上庠重與習鴻儀  
鄭虔入宦休嫌冷梁灝題名尚未遲  
况值稱觴歸故里八旬偕老慶齊眉

題葛梓舫主簿垂釣獨立圖

在昔羊裘翁嚴灘結茅屋垂釣偕漁僮  
避心寄空谷亦有元真子浮家享清福  
頭銜署釣徒超然絕凡俗君乃梓川裔  
遙繼仙躅不受塵網羈閒曹甘隱伏  
偶爾弄釣竿高懷謝拘束蓑笠時隨身  
料頭又赤足涼月蓼花紅疏雨柳陰綠  
往來漁弟兄釣艘繫山麓有時鼓櫂游  
風帆移幅幅有時得魚歸柴門好剝啄  
湖天秋思清盪胸復娛目詩成招鷺吟  
酒醉伴鷗宿披圖擬訪君素心慰昔夙  
一笑欲忘機共把漁譜讀

烏程鈕映泉家煥以令慈方太孺人殉節事徵詩



月湖：水清且潔，一丸冷浸湖心。月中有婷，烈媛魂霜天紅灑。  
杜鵑血往年壬戌狂寇來，戎馬羽書競馳突紛，官吏自保身樂。  
侮不聞挺身出，是時湖郡方被圍，烽煙日逼，爭攻奪，悍卒叫，鷄饑。  
民啼糧食已盡，援兵絕，俄焉城陷，門洞開，男奔女竄，半存致卓哉。  
鈕家門第高，人人爭道，烈婦烈倉卒臨變，語從容，欲死未死，心鬱。  
：囑兒好隨大母行，吞聲飲泣，肝腸裂，奮身一躍投清流，視死如。  
歸志早決，家乘邑志永流傳。從此不愁網常滅，昨歲令子徵詩章。  
示我一篇詞，淒切鄙人一讀一擊節，闡揚愧乏如椽筆。今年海波  
正沸揚，士卒退縮氣先竭，幾人畏死甘偷生，鬚眉返遜巾幗傑。所  
願大吏采風謠，激厲精忠戒苟活。他時綽楔樹清門，芳名不朽彤  
管搨。

題馮子若錫綬春江放櫂圖

尋詩載酒櫂聲中，畫鷁飄飄四望空。恰好桃花春漲暖，一船煙月  
一帆風。

我亦年來慣浪游，吳淞江上泛扁舟。綠波紅雨濃如畫，笑指中流  
問白鷗。

題陸潤珊上舍遺稿

一卷遺詩筆有神，知君曾是苦吟身。秋來桐院風蕭瑟，韻事而今

少替人

當日吳中有布衣劍南宗派尚依稀鐵簫老去流風杳如此詞壇  
識者稀

海昌蔣生沐選刻陸鐵簫詩名為吳中布衣集



卷之四